

TOP-UP & WIN YOUR DREAM CAR



24/7 Customer Care: Call 345 6789 or www.telikompng.com.pg

Worth of **K25,000** every month

*Check in-store Posters for more details

TOP UP WANTAIM EVD NA KISIM 20% MOA

Top Up wantaim Electronic Flex wantaim K3 or moa na kisim 20% extra credits



SMAIL LIKLIK: Praim Minista Peter O'Neill, meri bilong em Linda, na Sif Jastis, Sir Salamo Injia i stori na lap liklik long opim bilong Namba 9 Nesenel Palamen long Tunde. Bikpela tokaut i kamap long gavman bai lukluk long senisim na rausim planti ol loa we i no gutpela bilong kantri. Wampela loa em Judisal Kondak Ekt. *Poto: Nicky Bernard*

Digicel

09/08/2012 14:08 TP31519559
DIGICEL BUSINESS CENTRE
305-340-784

E Flex

AMOUNT	TOTAL BALANCE
K3	= K3.60
K5	= K6
K10	= K12
K20	= K24
K50	= K60
K100	= K120

Credited to 7200000
Confirmation: 362394967291
Reference: 13359959
Top Up Successful

Digicel

ELECTRONIC TOPUP

3G

t f

Digicel

Rausim loa i gat asua

Aja Alex Potabe i raitim

GAVMAN bai mekim bikpela wok stret long rausim ol olupela loa, na tu ol arapela loa na ekt ov palamen i gat asua long en.

Gavana Jeneral Gren Sif Sir Micachel Ogio i mekim dispela toktok long namba wan toktok bilong en taim ol i opim nupela namba 9 nesenel palamen long Tunde moning

Sir Michael i tok; "Long promotim na strongim gut-pela pasin bilong bel isi, yuniti, rispek na independens namel long ol tripela han bilong gavman gavman bai rausim Judisal Kondak Ekt, Suprim Kot Amendmen Ekt, Palamentri Pawas & Privileges Ekt, na Praim Minista & NEC Ekt."

Bipo gavman bilong O'Neill-Namah i bin kamapim ol dispela nupela loa long larim gavman i luk stret long ai bilong loa, na tu long sakim tupela disisen bilong Suprim Kot, tasol mekim Palamen kamap suprim o moa antap tumas long judisari.

Long wankain taim ol bai kamapim nupela loa, na tu senisim sampela loa o ol ekt ov palamen long larim PNG i kisim benefit aninit long ol dispela ol nupela loa.

I go moa long pes 2



SAPPHIRE SPRINGS

Naturally refreshing Mountain Spring Water at an affordable price!

330MLS, 600MLS & 1500MLS



Spring Water long Maunten Stret!

TELE Apdeit

Citifon SMS
Vois & Data
Top-Up

Risasim Vois Akaun
bilang Yu

1.Skrapim silva panel
long baksait bilong
Telikad/Rait Kad long
kisim 12-pela namba.

2.Opim nupela SMS

3.Taipim V bilong vois,
na bihain long en, taipim
* na bihain Telikad/Rait
Kad Namba

4.Salim i go long 1257

5.Wet long kisim SMS
toksave bekim bilong yu

E . g T a i p i m
(V*xxxxxxxxxxx) salim i
go long 1257

Risasim data
akaun

1.Skrapim silva panel
long baksait bilong
Telikad/Rait Kad long
painim 12-pela namba.

2. Opim nupela SMS

3. Taipim D bilong data,
na bihain long en, taipim
* na bihain Telikad/Rait
Kad Namba

4. Salim i go long 1257

5. Wet long kisim SMS
toksave bekim bilong yu
E.g Taipim
(D*xxxxxxxxxxx) salim
i go long 1257
Sekim Data (D) o Voice
(V) Balens bilong yu

1. Opim nupela SMS

2. Taipim V o D na salim
i go long 1256

3. Wetim balens
toksave bekim bilong yu



Call 147
Citifon SMS 345 4789

LTC kot long Madang stat gen bihain long ‘kambang’ i stopim

PROVINSAL Edministreta (PA) bilong Madang, Ben Lange i tokim ol papagraun insait long Ramu Projek long soim gutpela pasin long ol wokman bilong gavman na noken pretim ol.
Mista Lange i mekim dispela toktok bihain long sampela lain papagraun long Kostal Paipain eria i tok sore long ol opisa bilong gavman husat i harim Spesel Lens Taitol Komisn miting long Madang.

Long las wik Fonde, Mista Lange i raitim pas i go long komisn siaman, George Minjihau long saspenim harim bilong LTC bihain long sampela lain bilong Raikos long Astrolabe Be i kapsaitim kambang rausim ples bilong harim toktok bilong graun long Jomba.
Dispela saspensen em ol i rausim bihain long ol Kostal Paipain lenonas olsem siaman, Sauye Parara, deputi kaunsil presiden bilong As-

trolabe Be LLG, Polon Seng na lida bilong ol klen insait long dispela LTC harim i bin bung wantaim ol komisinas long Mande.
Mista Parara i makim maus bilong ol lida bilong Astrolabe Be long tok sore long ol tripela komisina em long Minjihau, Benedict Batata na Butt Paonga na ol opisa bilong ol.
Madang Provinsal Mains Dairekta, John Bivi i tok olsem dispela spesel LTC

harim i wok long kisim longpela taim tru na ol papagraun i mas wok bung wantaim na givim toktok bilong ol na i no ken westim taim nating long harim dispela bikpela miting.
Mista Bivi i tok ol pipel husat i bung long LTC i mas wok bung wantaim ol komisina na givim stori bilong ol, na noken pretim ol gavman opisa wantaim posin sanguma nabaut.
Em i tok ol lain wantaim trupela stori na ol trupela lain

tasol i mas go long LTC. Ol giaman konman na mauswara lain mas noken go na westim taim bilong kot.
Em i tok planti ol gutpela na trupela lain insait long Ramu Projek i laik lukim developmen i kamap na tu i laik kisim helpim olsem royalty taim developa i salim ol minerals i go ovavis, olsem na ol man i no ken pretim ol na westim taim long LTC i harim ol toktok bilong graun.

Australia givim bikpela helpim wantaim marasin

Veronica Hatutasi i raitim
ASKIM i go aut long ol rurel helt senta na etpos long rausim ol olupela marasin we taim bilong ol i lus pinis, long mekim spes long ol nupela saplai ol bai kisim.
Program dairekta bilong Helt na HIV na AIDS wantaim AusAID long PNG, Dokta Geoff Clark, i tok olsem aste long stat bilong tilim ol marasin program long ol haus sik, helt senta na etpos long kantri.
Long dispela wik, AusAID i statim bikpela program we em i tilim ol marasin na ikwipmen em bin baim long kantri Holan, i go aut long ol haus sik long PNG.
“Bihainim askim bilong gavman bilong PNG, AusAID i bin baim 10,000 medikel saplai bokis we ol bai tilim i go aut long 700 riferel haus sik na ol helt

senta na 2,000 etpos.
Ol dispela marasin bai stap long wanpela yia,” Dokta Clark, i tok. Na pe bilong ol marasin na salim ol i go long ol haus sik em K80 milian.
Dokta Clark i tok ol bin baim ol marasin long Holan na ol i bin sekim ol gut na ol i gutpela kwaliti marasin.
Em i tok Australia i helpim PNG long nupela rifom o ol senis long kisim helt sevis i go aut, moa yet, long ol rurel eria we bikpela mak bilong pipel i stap long en.
“Australia i helpim PNG i kamapim wanpela gutpela rot we bai wok na i stap long tilim ol marasin i go aut long 2,700 helt senta na etpos long ol rurel eria. Mipela i helpim PNG tu long kamapim wanpela nupela helt bodi we bai lukautim eria bilong baim, kisim na tilim ol marasin. Dispela em long lukim olsem ol haus sik

long ol rurel eria i kisim ol marasin long taim, na long we bai mani i no tromoim bikpela mani nating,” Dokta Clark i tok.
Wok tilim marasin bai go het inap long neks yia.
Tilim i bin stat long Pot Mosbi Jenerel Haus sik we em bin kisim 74 bokis marasin.
Dokta Clark i tok gavman i save givim inap mani long Helt Dipatmen taim em i wokim baset olgeta yia, tasol sistem i save pondaun long mekim mani i mekim wok em i sapos long mekim na karim gutpela kaikai.
Sif Eksekutiv Opisa bilong Pot Mosbi Jenerel Haus sik, Sam Vegogo, taim em i tok tenkyu long Australia na pipel bilong em long gutpela helpim ol i givim, i singaut long gavman long sanapim wanpela sistem bai stap bilong kisim na tilim ol marasin i go aut. Na dispela bai lukim olsem ol haus sik,

helt senta na etpos long olgeta hap bilong kantri i no inap sot long ol marasin saplai.
“Sot long marasin em samting i save kamap planti na midia i save ripotim dispela olgeta taim. Sampela taim mipela save yusim mani bilong mipela yet long baim ol marasin, na bikpela tok tenkyu i go long Australia na pipel bilong em. Tasol dispela helpim bai i go i go na bai inap we? Olsem na mi singautim gavman long statim wanpela sistem i wok bai stap long baim na tilim ol marasin na pipel bai kisim long taim stret.
Ol dispela marasin i gat long em ol anti baiotiks, amoksilin, penedol, malaria marasin, ol marasin bilong helpim ol mama bihain ol i karim pikinini, stopim ol mama i karim pikinini na lusim planti blut, tritmen bilong hai blut presa na planti narapela moa.

i kam long fran pes
Rausim loa i gat asua
Sir Michael i tok gavman bai stretim gen o rivuium Mama Loa tu long larim politikel stabiliti i stap. Em i tok ol dispela loa gavman i tingting long senisim em ol loa bilong makim praim minista, tem bilong palamen, Ogenik Loa long Nesenel na Lokol Level Gavman Ilekseen, Ogenik Loa long Integriti ov Politikel Patis na Kandidet long larim ol kamap moabeta na fitim gut tru politikel stail bilong tude.
“Long wankain taim bai mipela i kamapim nupela loa o lejislesen long rausim ol politikel asua o ansetenti, na kamapim nupela gutpela ples long larim gavman i karimaut ol polisi na program bilong en,” Sir Michael tok.
Em i tok gavman bai pasim tu nupela loa ol i kolim Ekt ov Indemniti (Indemnity). Dispela loa i stap long planti kantri na em bai helpim ol manmeri husat i kisim bagarap, long kisim insurers mani.
“Long larim moa invesmen na mekim isi long larim ol manmeri go raun long ol poroman kantri klostu olsem Australia na Nu Silan, mipela i laik pasim Dual Sitisensip Ekt. Mipela i laik kamapim wanpela loa long setim Indipenden Komisn Agensim Korapsen (ICAC),” Sir Michael i tok.
Ol arapela loa bai gavman i lukluk na stretim gen em ol NCDC Ekt, Pablik Sevis Menesmen Ekt, Pablik Fainens Menesmen Ekt, Oil & Gas Ekt, Maining Ekt, Polis, CIS & Difens Ekt, Edukesen Ekt, Ogenik Loa long Ilektoral Baundris Komisn Ekt, Ogenik Loa long Provinsal na Lokol Level Gavman.
Gavman bai kamapim nupela loa tu long setim Lae na Hagen Siti Komisn, long larim tupela bikpela siti bilong PNG luk wankain oslem NCDC.
“Mi save olsem dispela em i sain em i ples klia bilong gutpela yuniti gavman long larim politikel stabiliti na ikonmik prosperiti,” Sir Michael i tok.



TENKYU LONG HELPIM: Sif Eksekutiv Opisa bilong Pot Mosbi Jenerel Haus sik, Sam Vengogo, i sekan wantaim Program Dairekta bilong AusAID Helt na HIV Program long PNG, Dokta Geoff Clark, bihain long prisentesen bilong ol medical saplai i go long Pom Jen Haus sik. **Poto: AusAID Midia**

Noken salim graun: Duban



Polisia Minista: Dixon Duban

NUPELA Polis Minista na memba bilong Madang, Dixon Duban i bin tok strong long ol lain Madang olsem ol i noken salim ol graun bilong ol, na mas wokim wok agrikalsa.

Em i bin mekim dispela toktok long ai bilong planti man, meri na pikinini long Bates Oval.

Em i salensim ol tu olsem husat man na meri i laik mekim bisnis mas kam fowet wantaim ol gutpela bisnis pepa na em bai helpim ol.

"Maski kamap les man na meri na salim graun bilong yu yet long liklik moni hariap tru bilong wanem dispela pasin bai mekim na planti problem bai kam insait long laip bilong yu. Na taim dispela i kamap, yu bai bel kros nating long ol polis na gavman olsem ol i no luksave long ol wari bilong yu," Duban i tok.

Em i tok kain ol hevi we save kam wantaim kastomeri graun, gastomari wok, na kain pasin bilong marit go kam bai hat tru long gavaman i stretim taim ol pipel i salim ol graun olsem.

Duban i tok ol pipel i mas lukautim ol graun bilong ol, na noken salim graun nating bikos graun em i wanpela namba wan samting long

laip bilong yumi ol manmeri Melanesia.

Em i bin askim ol lida na lokol kaunsila long go aut na skulim ol lain bilong ol long gutpela na nogut bilong salim graun.

Duban i tok tu olsem em bai kamapim wanpela loa long palamen long stopim ol manmeri long salim ol kastomari graun nating nating long ol outsait manmeri.

Bihain long displela, em i givim K100,000 i go long kirapim gen Madang So long dispela mun Septemba dispela yia.

Gavana bilong Madang Jim Kas, husat i bin stap long hap tu, i tok logeta memba bilong Madang mas wokbum wantaim long kirapim bek gutpela nem bilong Madang olsem 'Bitipul Madang.'

Long statim klin-ap bilong Madang taun, Duban i givim K200,000 i go long ol polisman, na askim olgeta manmeri long wok wantaim em long senisim Madang kamap wanpela gutpela ples insiat long kantri.

Em i tokim ol pablik sevan long noken bagarapim ol samting bilong gavman bikos em bai mekim save long man o meri husat i no bihainim loa.

WANT TO BE THE NEXT ONE



402 WINNERS SO FAR!

You could be the next Winner!

Share in PNG's Biggest EVER Cash Prize Giveaway of

K1,600,000!

1 Grand Prize winner of K1,000,000

drawn in December, 2012

Simply complete eligible transactions with your BSP Card at any BSP ATM, BSP EFTPoS Device or via BSP Mobile Banking and you will go into the draw



Find Us On:



www.bsp.com.pg

Refer to our website for full Terms & Conditions.

Niupela

Maggi

MagicTeist

Wanpela kain kiking pauda

Bai givim
BEST teist
long
kainkain kuk



Gavana Jeneral Gren Sif Sir Michael Ogio i sanap wantaim ol memba long kisim grup piksa bihain long ol i opim namba 9 Nesenel Palamen. *Poto: Aja Alex Potabe*

Namba 9 Nesenel Palamen i op

Aja Alex Potabe i raitim

NAMBA 9 Nesenel Palamen bilong Papua Niugini i op pinis dispela wok Tunde long Palamen Haus. Bihain long dispela opening seremoni, ol memba i ken go het long mekim wok bilong ronim dispela kantri.

Gavana Jeneral Gren Sif Sir Michael Ogio i bin go opim dispela nupela palamen. Ol biknem lida bilong kantri olsem Sif Jastis Sir Salamo Injia, na ol arapela brata na susa jas, Palamen Spika Theo Zurenuoc, Praim Minista Peter O'Neill, na PNG Difens Fos komanda Brigeda Jeneral Francis Agwi i bin go pas long opening seremoni.

Oposisen Lida Belden Namah i no bin stap dispela taim, na Deputi Oposisen Lida Sam Basil i bin kisim ples bilong Namah.

ambesada na hai komisina bilong ol poroman kantri bilong PNG, na ol arapela manmeri tu i bin pulapim insiat na autsait bilong palamen haus long lukim dispela namba wan de, we em i save kamap olgeta faiv yia.

Planti gutpela samting i bin kamap long hap long Tunde moning long 8-kilok i go inap 12-kilok.

Long 8-kilok moning stret, ol ami, polis na wada i bin bung long mekim ol mas, pilai ben na wetim gavana jeneral, na ol bikman bilong kantri long kam insait.

Long 9-kilok Zurenuoc i bin kam wantaim meri bilong en. Bihain long en, Basil, i bin kam. Basil i no bin kam wanaim meri bilong en, tasol em yet wan i kam.

Bihain long dispela, Sif Jastis bilong Nesenel na Suprim Kot, Sir

Salamo Injia na Praim Minista Peter O'Neill i bin kam wantaim meri bilong tupela. Gavana Jeneral Sir Michael Ogio na Lady Esmie i bin pasin wok.

Komanda bilong PNG Difens Fos, Brigeda Jeneral, Francis Agwi, i bin redi long Haus Palamen long bungim ol dispela bikpela man bilong kantri.

Taim Sir Michael i bin kam, em i bin lukluk raun long gat ov ona long ol PNGDF ami, na lukluk raun tu long ol polis na wada, husat i bin pilai ben na musik.

Long 10-kilok, taim gavana jeneral i kambek na sanap lukluk go daun long ol ami i mas, narapela grup ami husat i werim yunifom long pait stret na sanap long sait sait, i pairapim gan i go antap long skai long opim

nupela namba 9 Nesenel Palamen.

Sir Michael i go pas insait long palamen semba na ol arapela bikman olsem praim minista, oposisen lida, sif jastis, na palamen spika i bihainim em i go insait.

Ol jas i bin sindaun insait long semba bilong palamen o hap we ol memba tasol i save sindaun. Sif Jastis na Spika i sindaun sait sait long sia bilong palamen spika taim gavana jeneral i bin sindaun long sia bilong spika long givim toktok long opim nupela palamen.

Ol arapela memba i no

bin toktok tasol ol i harim Sir Michael i toktok. Ogio i bin kisim ples bilong Spika na toktok long ol gutpela samting gavman i mas mekim long strongim groa bilong dispela kantri.

Taim Sir Michael i pinisim toktok bilong en, spika i surukim palamen i go log 2-kilok apinun. Gavana Jeneral i bin kisim grup poto wantaim ol memba ausait long palamen haus.

Gavana Jeneral, ol jas na wokman bilong judiseri, na ol ami, polis na wada i go bek wan-wan bihain long dispela grup poto sesen.



enel pinis



GG inspektim Gad ov Ona long namba 9 palamen i op...

Oposisen no wanbel long toktok bilong GG

Aja Alex Potabe i raitim

OPOSISEN i no wanbel long toktok Gavana Jeneral Gren Sif Sir Michael Ogio i mekim long opim nupela namba 9 nesenel palamen.

Deputi Oposisen Lida, Sam Basil, i tok dispela toktok bilong Sir Michael i no stret long iao bilong Oposisen bikos em i olsem gavman polisi, i no toktok we gavana jeneral, husat i makim maus bilong Kwin inap long mekim.

"Mipela i ting GG bai stap namel long mekim stretpela toktok. Tasol dispela toktok em i mekim i luk olsem em i mekim toktok praim minista inap long mekim. Mipela pilim Sir Michael i wansait stret long gavman bikos em i toktok long olgeta gavman polisi praim minista inap

long tokaut long en," Basil i tok.

Em i tok tu olsem bihain long gavana jeneral i toktok pinis na lusim palamen haus, pasin bilong Wesminsta sistem bilong gavman, i save larim praim minista i mekim toktok bilong en.

Bihain long praim minista, oposisen lida inap long mekim toktok. Tasol Peter O'Neill i no bin redim wanpela samting long tokim palamen na kantri long dispela taim.

"Taim mi laik toktok na mi sanap taim, Spika i wansait olgeta na givim taim long Lida ov Gavman Bisnis, James Marape, husat i ad-jonim o surukim palamen i go long Septemba 4.

"Dispela i no stret. Em i wansait tumas. Long gutpela bilong dispela kantri, spika i noken wansait. Em

tokaut stret oslem em bai nonap wansait taim em i kisim dispela namba wan sia, tasol nau em i giaman gen," Basil i tok.

Basil i tok dispela i no gutpela stat bilong O'Neill-Dion Gavman taim tupela i tok promis pinis long mekim ol samting gut long nem bilong ol pipel.

Lida bilong PNG Konstitusenal Demokretik Pati, Tobias Kulang, i tok posisen bilong gavana jeneral em i wanpela namba wan posisen, we em i makim Kwin bilong Inglan na Komonwel, He Majesti Kwin Elizabeth II, na dispela kain pasin bilong wansait i ken bagarapim nem bilong gavman haus.

"Mipela belhat nogut tru wantaim gavana jeneral. Em mas putim em yet kamap namel man. Em i noken wansait tasol long gavman," Kulang i tok.



OPOSISEN BELHEVI...Deputi Oposisen Lida Sam Basil i autim belhevi bilong oposisen long toktok bilong Gavana Jeneral Sir Michael Ogio.

Gavman sapotim tupela LNG Projek

Aja Alex Potabe i raitim

GAVMAN i putim ai long dispela tupela LNG Projek i kamap long kantri bikos em i gat bikipela bilip olsem dispela tupela namba wan projek i ken senisim dispela kantri sapos gavman i sapotim gut dispela projek.

Gavana Jeneral Gren Sif Sir Michael Ogio i mekim dispela toktok hap aste long palamen haus taim em i opim nupela namba 9 nesenel palamen.

Long toktok bilong en, em i tokaut long sampela ol eria we gavman i laik lukluk i go insait long senisim dispela kantri.

Wanpela bilong ol dispela eria em i tupela LNG Projek,

we gavman i gat bikipela laik long sapotim tupela kampani wantaim long statim projek na pinisim projek long taim stret.

"Gavman bai larim PNG LNG Projek i salim namba wan LNG ges bilong yumi i go aut long ovasis maket long yia 2014, na larim gavman i kisim winmani hariap long taim stret," Sir Michael i tok.

Em i tok gavman bai sapotim tu narapela LNG Projek long Galp Provins, we InterOil i go pas long en.

"Dispela gavman bai sapotim tu InterOil LNG Projek long larim namba tu LNG Projek long kantri i kamap long taim stret.

"Sait bilong dispela projek,

gavman bai hariap tru makim ol maus man bilong gavman long stretim toktok o stet negosieting tim i kam long wan-wan namba wan gavman ejensi long stretim ol toktok na pepa wok long kamapim Ges Agrimen wantaim InterOil na ol projek patna bilong en," Sir Michael i tok.

Dispela stet tim makim maus bilong gavman bai wok wantaim Petromin PNG Holdings Limited, husat gavman i makim long kamap wanpela projek patna, long stretim toktok long kamapim wanpela gutpela Ges Agrimen.

Ol bai stretim toktok long apim ol benefit bilong ol papagraun, lokol level gavman, na provinsal gavman tu.

Ol yangpela i selebretim de bilong ol

YANG Kristen (YC) fil long Goroka i bin pulap tru long Ogas 10 long ol yangpela husat i bin bung long selebretim Intanesenel Yut De (IYD).

Wantaim het tok, "Bildim gutpela wol-Patna wantaim ol yut", planti yut i wok, skul na mekim wanem kain samting i stap i bin kam wantaim long selebretim we ol Mesi Sister (Mercy Sisters) i bin go pas long en na ol i holim long Mesi Woks Trening Senta.

Ol institusen olsem Provinsel FODE opis, Nasing Kolis, Bisnis Kolis, Save the Children (Yut Autris Projek), Nesenel Katolik Famili Laip Apostulet, Kopi Industri Koporesen, Frenli Yut Senta na Koreksenel Institut Sevis Bihute i bin wok patna wantaim ol

lain long Mesi Trening Senta long skulim ol yut, ol skul mangki, na pablik olsem ol yut em ol bikpela samting bikos ol tasol bai kamap ol lida bilong bihain taim na holim kantri i go.

Sister Theresa Boiyek bilong Mesi Woks i bin tok tenkyu long ol patna, ol yut na ol mama husat i bin karim ol kaikai samting ol i mekim ol yet long serim wantaim ol narapela long bung. Em ol prodak samting olsem maunten hani, sop ol yet i wokim, ol plent, bret na kek ol i wokim long tapioka flawa, ats na krafs, sips ol i wokim long tapioca na plnati moa.

Dairekta bilong Mesi Woks, Sister Maryanne Kolkia, i bin givim ripot long ol developmen na senis we PNG i lukim

stat yet long yia 1975 inap long 2011.

Em bin tok ol ripot i kam long PNG Visen 2050, PNG Developmen Strateji 2010-2030, Wol Benk, Yunaitet Nesens na Trensperensi Intanesenel.

Em bin tok ripot i glasim ol 8-pela samting we i save soim mak long developmen bilong kantri olsem hamas ol bebi aninit long 5-pela krismas i dai o i stap laip yet, mak long ol mama i karim bebi na is tap laip yet o i dai, nogat wok, hamas manmeri i save long rit na rait, mak long krismas we pipel long PNG save nap na dai long en, humen developmen na pasin turangu stat long intanesenel level i kam daun.



National Information and Communications Technology Authority

Pablik Notis

Salim na Yusim ol Transista Redio Risiva i nogat tok orait

NICTA em i wanpela reguleta tasol bilong infomesen na komyunikesen teknoloji long kantri. Wanpela bikpela wok bilong en em long tok oraitim na skelim gut salim na yusim bilong ol redio komyunikesen teknoloji o masin long PNG.

Ol Impota, Holsel, Ritel, Saplaia, Distributa, Dila na jeneral pablik wantaim i mas luksave olsem em i asua aninit long Redio Spektrum Regulesen 2010, long yusim, holim, kisim i kam insait long kantri, salim o saplain wanem ol masin olsem ol transista redio risiva i save wok ausait long Spektrum Plen bilong PNG.

Penolti o mekimsave bilong dispela asua i gat fain i no abrusim K10,000 na husat manmeri i abrus long bihainim wanem ol arapela askim o oda i kam aninit long dispela regulesen i asua pinis, na i gat wanpela penolti o fain mekimsave inap long K10,000 olgeta wanwan de ol i no bihainim stret loa.

NICTA i luksave long sampela ol bren bilong ol transista redio risiva i wok ausait long PNG Spektrum Plen na i orait long kisim ol radiokomyunikesen siknel i nogat tok orait long en. Ol Redio Inspekta bilong NICTA bai karimaut ol wok inspeksen long ol ples insait long kantri, na rausim olgeta ol transista redio risiva i nogat tok orait long en.

Ol transista redio risiva we ol i mekim wantaim strong inap long kisim ol redio brodkas siknel ausait long FM ben 88.0MHz i go inap long 108.0 MHz we NICTA i tok orait long en, i nogat tok orait long yusim insait long PNG.

NICTA i givim nau wanpela malolo taim i go inap Ogas 31, 2012 long ol manmeri na bisnis yet long tokaut na givim olgeta ol transista redio risiva i nogat tok orait, na ol arapela long ol dispela i stap daunbilo, na bihain long dispela taim, husat manmeri o bisnis i salim yet ol dispela, bai kisim mekimsave long ol i brukim loa.

Bren:	Modol:	Bren:	Modol:
ShouYu	LY-5400UAR	ShouYu	LY-5430UAR
Pu Xing	PX - 3300	Kalade	KK - 9
Livestar	CNN - 1312DL	MiK	KK - 9
SANLEE	RX - 878	Wanliming	TS - 9989
JSBO	JB201 - 203		

Dispela notis i karamapim tu ol saplaia, dila o papa bilong ol kar i gat ol transista redio risiva na ol arapela risiva i nogat tok orait i stap long en.

Ol Bisnis, stua na pablik i mas wokbung wantaim na autim olgeta ol transista redio risiva na ol arapela masin i nogat tok orait, i go long NICTA. Olgeta askim i ken go long: Manager Enforcement and Compliance long telepon namba: 303 3262, feks: 300 4829 o email: gnakau@nicta.gov.pg o typeapproval@nicta.gov.pg

Wantok Bisnis Indeks

OLGETA FONDE

LOANS

PERSONAL LOANS

In today's economy there are very few that can claim that they are "Debt Free", and in some cases they are so deep in debt that they are in between a rock and a hard place. This **Debt Relief** refinancing pill is meant to solve all of your financial problems of multiple loans and aide you on your quest to "MORE TAKE HOME PAY" each pay day!



Please contact our Pharmacists to avail one today!

moni

Fast, Quick & Easy

Responsible Lending APPLY NOW!!!

Po Box 1748, Boroko, NCD
Tel: 323 3396 / Fax: 323 3438/3238458
Email: info@moni.com
Mobile: 77903396/77903396/77903396

TRAINING



THE ADVANCE DIPLOMA IN ACCOUNTING

• Upon completion of the Advance Diploma in Accounting, students are eligible to apply for Bachelor Degree in Accounting at the University of Southern Queensland with the exemption of eight (8) units.

• The Certified Practising Accountants of Papua New Guinea (CPA PNG) has recognised the "ADVANCE DIPLOMA IN ACCOUNTING" as an entry qualification to become a Certified Accounting Technician (CAT) of CPA PNG.

• Advance Diploma in Accounting requires the completion of 10 units (five units per semester).

Semester 1

- Financial Accounting
- Management Accounting
- Intermediate Auditing
- Introduction of Economic Principles
- Elements of Information System

Semester 2

- Corporate Tax
- Professional ethics
- Specialized Accounting Practices
- Quantitative Methods in Business
- Principles of Management and Marketing

Application is open for AUGUST INTAKE!

New Restructure Course

Entry Requirement:
Diploma in Accounting from ITI or from other Higher Institutions.

Contact ITI Marketing Team on:
POM-IT: 320 2860 ext 129 / 107 / 104 Fax: 320 0513
mobile: 7197 2602 / 7685 0523
Email: enquiries@iti.ac.pg Website: www.iti.ac.pg
LAE-Ph: 472 2790 Fax: 472 0199 Email: enquiries@laeiti@gmail.com



Wantok

Ki Tasol!!

Em nau! Niuspepa bilong yumi ol PNG stret!!

Nupela WANTOK BISNIS INDEKS i kamap insait long niuspepa!

Sapos yu laik etvatais insait long Wantok Bisnis Indeks...

Ringim Samuel Koim long fon 325 2500, email: skoim@wantok.com.pg o feks i kam long 325 2579 long stretim wari bilong yu!



Wantok

Niuspepa Bilong Yumi Ol PNG Stret!



NUPELA BUK KAMAP: *lep i go long rait*: Profesa Alan Rumsey em i edita bilong buk, Dokta Kirsty Gillespie i raitim wanpela sapta, Dokta Bernard Minol i makim buk i kamap, na Dokta Don Niles em i narapela edita na raitim wanpela sapta bilong buk tu. *Poto: Gedisa Jacob*

Buk i kamap long pasin bilong singim stori long Hailans

Dokta Don Niles i raitim

LONG Ogas 8, 2012, Institut bilong Papua New Guinea Stadis (IPNGS) i wokim bung long makim nupela buk i kamap. Nem bilong dispela buk em *Sung Tales from the Papua New Guinea Highlands*. Alan Rumsey tupela Don Niles i wok edita o mekim wok long raitim na stretim dispela buk.

Kain taim olsem em pasin long wanpela grup i wokim singsing long welkamim na amamasim ol manmeri. Tasol long makim dispela buk, i no gat singsing grup olsem. Taim ol manmeri i kamap long IPNGS ol i harim kaset bilong man o meri Hailans i singim stori. Bihaim nau video i kamap em soim dispela pasin tu.

Naomi Faik-Simet em i tok welkam long ol lain i kam long IPNGS long dispela bung. Bihain nau, Dokta Don Niles i toktok.

Dokta Niles em i Eking Dairekta bilong IPNGS, na tu em i wanpela edita bilong dispela buk na em i raitim sampela sapta insait long en tu.

Niles i tok, i no gat singsing grup bilong wanem, em i laik ol manmeri i kam long harim pasin bilong sampela savelain Hailans long singim stori.

Long olgeta hap long PNG, i gat ol manmeri i save wokim tumbuna stori. Tasol long sampela hap bilong Hailans, i gat pasin bilong stori i narakain liklik.

Dispela stori em long amamasim ol manmeri i harim. Wanpela man o meri bai stori na nek bilong em bai go antap na i go daun, wankain liklik long pasin bilong singim song. Tasol em i no singsing, em i stori ya. Long sampela hap, wanpela bai singim stori long sampela minit tasol. Long sampela arapela hap, kain stori olsem bai i go i go long sampela aua. I gat kainkain pasin bilong singim stori.

Taim man o meri i singim stori, ol yet bai tingting long wanem toktok ol i laik mekim. Ol manmeri i harim, ol i save pinis long stori, tasol ol bai amamas tru long harim pasin bilong man o meri i singim stori. Taim wanpela i singim stori pinis, ol lain i harim bai baim ol tu long hatwok bilong ol.

Long mekim wok painimaut long dispela pasin bilong singim stori i mas i gat ol manmeri i gat gutpela save long tokples, pasin bilong ples, singsing, na ol arapela stori. Long 2003 inap long 2006, wanpela projek i kirap long mekim dispela wok. Ol lain long Australian Research Council i givim sapot long dispela projek. Manmeri bilong Papua New Guinea, Australia, Amerika, Jemani, Malesia na Nu Silan i wok wantaim long mekim dispela wok painimaut.

Na tu woksop long singim stori i kamap long Goroka long 2004 na long Kefamom long 2006. Ol manmeri i wok long projek i laik wanpela buk i mas kamap tu long helpim ol manmeri kisim save long dispela pasin bilong singim song. Olsem na Profesa Alan Rumsey long Australian National University (ANU) i go het long askim ol manmeri i gat sampela save long dispela pasin long raitim sapta long wanpela buk. Ol lain long Australian Nesenel Yunivesiti (ANU) E Press long Canberra i stretim ol samting bilong buk na em i kamap long pinis bilong 2011.

Taim Prais Ministia Peter O'Neill i raun i go long Australia long Oktoba 2011, em i bin bungim Gavana Jeneral bilong Australia, Quentin Bryce. Taim tupela i bung, Prais Ministia O'Neill i givim kopi bilong dispela buk i go long en long Gavana Jeneral long makim gutpela wok i kamap namel long Australia na Papua New Guinea.

Pasin bilong singim stori i stap long Hela provins i go long Enga na planti hap long Saten Hailans na hap bilong Westen Hailans tu. Namba wan sapta bilong buk Niles na Rumsey i raitim, na ol i stori long dispela pasin long Hailans.

Dokta Kirsty Gillespie bilong Yunivesiti bilong Kwinslen (Queensland) i toktok long IPNGS tu long makim dispela buk i kamap. Gillespie na Lila San Roque i raitim wanpela sapta long buk em i stori long pasin bilong ol Duna bilong Hela long singim stori ol i kolim *pikono*. Kenny Yuwi Kendoli na Michael Sollis i raitim stori long *pikono* tu. Long ol Huli long Tari, pasin bilong singim stori em i *bi te*. Gabe C. J. Lomas na Jacqueline Pugh-Kitingan i raitim sapta bilong buk long *bi te*.

Narapela man i raitim sapta bilong buk i kam long IPNGS na toktok tu. Em Pater Phillip Gibbs (Institute for Social Concern, Mt. Hagen). Gibbs i rait long pasin bilong singim stori long hap bilong ol Ipili na Enga. Terrance Borchard na Frances Ingemann i rait long Ipili tu, na Hans Reithofer i raitim sapta long ol Angal o Mendi.

Profesa Alan Rumsey em narapela edita bilong buk na em i toktok tu. Rumsey em i stori long pasin bilong ol Ku Waru bilong Westen Hailans long singim stori em *tom yaya kange*. Niles i raitim sapta long dispela pasin bilong ol Ku Waru na bilong ol Melpa tu. Long pinism buk, Andrew Strathern na Pamela J. Stewart i raitim sapta long ol Duna na Melpa, na long wankain pasin bilong ol lain i bin i stap long Rom long taim bipo tru.

Why pay 30% PLUS interest rates ?

TISA LOANS

"Designed especially for members financial needs. You can loan for a minimum of K200 to a maximum of K100,000 depending on your savings with an interest rate of 1% per month and repay over a maximum 36 month period."



SERVICE with a **SMILE!**

12% INTEREST PER ANNUM

36 MONTH REPAYMENT PERIOD



watch your savings grow

Head Office

P.O. Box 319, Waigani, NCD
Level 1-2, Haus Tisa, Sir John Guise Drive & Kumul Ave
Papua New Guinea
Phone: (675) 325 7599 or 300 2200
Facsimile: (675) 325 7679
Email: marketing@tsl.org.pg
Website: www.tsl.org.pg

Not for Profit, Not for Charity, But for Service



Mary em gutpela TB volontia

KEREMA Blok long 9 Mail, Mosbi, nau i wok long gat gutpela save long sik TB na ol i wok long helpim ol lain i gat dispela sik.

Dispela i kamap bikos long hatwok bilong wanpela meri na famili bilong em we i wok long karim kaikai nau.

Mary Savo bilong Malalaua long Galp Provins i save stap long Kerema 9 Mail Blok ausait long Mosbi siti. Em i kamap olsem

wanpela volontia husat i karimaut awenes wok long sik TB long komyuniti bilong em na tu, sapotim ol lain i stap insait long TB DOTS Program.

PNG i gat bikipela mak long sik TB long Esia na Pasifik rijen. Na maski PNG i wanpela kantri we ol bikipela wara, maunten na solwara i katim, olgeta viles i serim ol hevi we sik TB i kamapim.

Long PNG, Nesenel

Tuberculosis Program (NTP) i save karimaut pait agensim sik TB. i no ol woklain bilong NTP na ol patna bilong ol i karimaut pait, tasol insait long ol komyuniti, i gat ol volontia i stap husat i helpim long lukim olsem ol siklain i kisim ol marasin bilong ol long taim stret.

Mary i wanpela long ol dispela volontia husat i save helpim ol lain i kisim TB tritmen long 9 Mail Setelmen, Kerema Blok.

Em i save karimaut ol wok awenes long sik TB na tu, sekim ol siklain i stap anin it long Daitek Obsev Tritmen Sotkos (DOTS).

Mary i bin stat long wok patna wantaim NTP long Disemba 2007 taim em bin bringim kandere bilong em i bin gat sik kus. Na taim ol bin sekim em na painim olsem kandere ya i gat sik TB, Mary i bin tren long kamap tritmen sapota.

Taim em i lukim

olsem i mas gat moa awenes long sik TB, em no bin yusim taim bilong em tasol long sapotim ol siklain o skulim komyuniti bilong em long luksave long ol sainmak bilong dispela sik na abrusim, tasol em bin kisim man bilong em Ken, na pikinini meri, long kamap olsem ol volontia tu.

Tupela i save helpim Mary long luksave long ol lain i gat mak bilong sik TB.



SIK TB KOMYUNITI AWENES: Wanpela volontia i skulim mama na famili bilong em long kisim ol marasin aninit long DOTS Program. Poto: Wol Visen Midia



Yut, Meri na Famili wantaim Lorraine Siraba

Putim mani na risos long skul bilong ol liklik

LONG las wik, ol priskul insait long Nesenel Kapitela Distrik (NCD) i bin bisi long karimaut ol aktiviti long soim olsem "early childhood learning" (ECCE) o skul bilong ol liklik pikinini i bikipela samting, na gavman i mas givim wankain sapot na luksave olsem ol narapela edukesen level.

Dispela em bikos long dispela taim, nesenel gavman i no save givim gutpela sapot i go long ol skul bilong ol pikinini krismas bilong ol i stap aninit long 5-pela yia.

Skulim na lukautim ol liklik pikinini i no nupela samting. Long tumbuna taim, papamama, ol ankel, anti na ol hauslain i save skulim na stiaim wokabaut na stap bilong ol liklik, tasol lon g tude, ol papamama i go aut wok long fomol na infomol sekta, na ol i lusim ol pikinini ol yet. Na ol i save lainim pasin long ol narapela.

Early Childhood Education i karamapim ol pikinini krismas bilong ol i stap aninit long 5-pela yia. Na dispela em i taim we tingting bilong ol pikinini i wok long groa hariap stret. Em i taim we ol pikinini i lainim ol velyu olsem rispek, sea, luksave long ol narapela, mekim gut long ol narapela na tu, em i taim ol i lainim long stap wantaim ol narapela, stretim ol hevi ol i gat, tingting long glasim na skelim ol smarting na lainim kalsa bilong ol.

Skulim ol liklik pikinini i gutpela bikos em i helpim long redim ol long go long elementeri skul. Sosel risets i soim olsem em i helpim ol pikinini long mekim gut long skul bihain na helpim ol long kamap ol gutpela sitisen husat i kontribut gut long developmen bilong kantri.

Tru, "early childhood care na education policy" em Nesenel Gavman i kamapim long edresim skul bilong ol liklik pikinini, planti moa samting i stap long mekim.

Kempen i bin kamap long las wik i gutpela bikos em i pondaun long taim nupela gavman i wok long kamap. Na i moabeta nau long wanem nupela gavman i mas putim skul na lainim bilong ol liklik pikinini krismas bilong ol i stap aninit long 5-pela krismas long ol plen na program bilong em. Sapos gavman i wokim dispela, bai ol sosel hevi olsem pasin bilong bagarapim na rabisim ol meri, hevi long kisim spak-brus na strongpela dring bai go daun.

Ol yia we pikinini i wok long groa em ol bikipela samting na ECCE i ken kontribut long planti gutpela ekspiriens we bai fomim gutpela beis long lainim na skul bilong ol pikinini long bihain taim.

Ol wok stadi i soim olsem gutpela kaikai, gutpela helt kea na seif environmen i ken helpim ol pikinini i kisim gutpela lainim.

Yumi ken inapim nesenel humen developmen sapos yumi stat nau long developim na sapotim strong lainim, lukautim na skul bilong ol liklik pikinini long aninit level i go antap. Na i no long kamapim ol program long daunim ol hevi we bai yumi bungim long en.

PNG SUSTAINABLE DEVELOPMENT PROGRAM LTD

OLPC i kam inap tude

Mi save amamas long lukim ol pikinini bilong mi i kisim save long yusim ol kain kain teknoloji o masin, na kisim gutpela bilong ol kain kain infomesen nau i stap long ol kompyuta. Mi bai hamamas tu sapos ol arapela papamama long PNG i ken lukim wankain hamamas mi lukim, taim infomesen na Komyunikesen Teknoloji (ICT) i kamap bikipela samting we i ken go insait long planti ol rurel skul bilong yumi.

PNGSDP i kamapim Wan Laptop Long Wanwan Pikinini (One Laptop Per Child o OLPC) program long PNG, na i givim pinis ol dispela masin long 12-pela skul. Ol dispela laptop ol i mekim bilong givim ol sumatin na tisa wantaim, dispela fridom bilong kisim infomesen i stap long kompyuta.

Klostu long boda bilong Indonesia em Kungim Praimeri Skul i stap. Em i wanpela long etpela skul insait long Not Flai Distrik bilong Westen Provins we ol sumatin na tisa i bin go insait long OLPC peilot program. Skul na komyuniti wantaim i hamamas tru long OLPC program. Em i gutpela tru long lukim amamas na laik bilong painimaut moa long ol pes bilong ol sumatin i wok long lukluk long ol dispela liklik grin na wait laptop. I no long taim, ol i save pinis long yusim, na ol i go het wantaim ICT.

Em i bikipela samting bilong ol tisa long save gut long we bilong yusim OLPC bilong givim skul. Olsem, na i gat wanpela OLPC tisa trening i bin kamap long Kiunga long mun Julai, bilong tupela tisa long wanwan long dispela etpela skul.

Tupela mausmanmeri bilong Kungim Praimeri Skul i bin autim bikipela laik tru long mekim OLPC i wok gut na halivim skul bilong ol. Bihain long trening, ol i tokaut olsem save ol i kisim, bai ol i kisim go na strongim ol arapela wanwok bilong ol. Tisa i go pas, Dickson Yorokam, i tokaut olsem skul i go het long wanpela tisa trening program bilong ol yet. Trening nau em olgeta tisa i mas bihainim, na em i save kamap wanpela de long olgeta wik, long 3 kilok i go 5 kilok long apirun.

Mi amamas long ol tisa, sumatin na komyuniti i wok long strongim ol yet long OLPC program. OLPC i noken samting i stap ausait long skul o edukesen. Wanpela tingting we olgeta ol dispela samting i givim long yumi, em olsem, yu no inap long givim nating ol kompyuta masin; yu mas lukluk tu long trening, mekim polisi, givim ol kurikulum matiriel na moa yet. Tisa trening tu em i bikipela samting bilong karimaut. OLPC i gat olgeta bikipela astingting na luksave long dispela. Olsem na yu ken lukim olsem dispela PNGSDP Projek i wok long soim bungim bilong ICT i go insait long praimeru edukesen sistem.

I kam long tebol bilong CEO (Article #31 bilong 2012)

CEO: David Sode

Tel: (675) 320 3844/45 | Fax: (675) 320 3855 | Email: enquiries@pngsdp.com
 Website: www.pngsdp.com

Sabsidi mani bai stap long ol skul akaun tumora

... Tasol ol skul mas gat stretpela sensus mak na akaun

Veronica Hatutasi i raitim

SKUL sabsidi mani bai stap long ol akaun bilong ol skul long dispela kantri long tumora, Fraide.

Tasol ol skul i mas givim ol rait infomesen na data bilong skul sensus na benk akaun, pastaim long ol i kisim ol skul sabsidi mani bilong ol.

Edukesen Minista, Paru Aihi, long las wik Fraide i bin tok K302 milian i stap pinis long benk, na 4-pela benk long kantri em Beng bilong Saut Pasifik (BSP), Wespek

, ANZ na Maikro Fainens, bai stretim ol dispela mani i go long ol akaun bilong ol wan wan skul.

Dispela em i namba tu hap bilong skul sabsidi mani gavman i tilim i go aut long ol skul aninit long skul sabsidi mani polisi bilong helpim ol pikinini long PNG i go long skul na kisim gutpela save.

Minista Aihi i tok gavman i laikim bai ol pikinini bilong dispela kantri i kisim kwaliti edukesen na olsem minista, em bai lukim olsem olgeta skul long kantri i kisim ol skul sabsidi bilong ol.

“Tasol tupela samting ol

skul i mas gat em, skul sensus ripot we i gat namba long hamas sumatin wan wan skul i gat long en, na stretpela skul akaun. Akaun i mas stap long nem bilong skul stret na i no narapela. Dispela tupela samting i stret, skul fi sabsidi mani bai go insait,” Mista Aihi i tok.

Long bung we Minista Aihi i bin singautim long las wik Fraide, ol lain i makim ol 4-pela benk i bin stap. Ol nius manmeri tu i bin stap.

Dispela em mak we ol i brukim ol akaun long ol sabsidi mani bilong ol 11, 340 skul long kantri long 4-

pela benk.

BSP bai lukautim ol akaun bilong 10,846 skul, Wespak em 107 skul, ANZ em 322 na Maikro Fainens Benk em 65.

Ol skul i stat long Elementeri i go long Sekonderi level bai kisim gavman skul sabsidi fi.

Minista Aihi i tok long namba wan peiaut bilong gavman skul sabsidi mani, 20.2 pesen o 2,233 skul , planti i stap long ol longwe ples, i no bin kisim ol sabsidi mani taim 80 pesen i bin kisim bilong ol.

Em i tok long nau,

Edukesen Dipatmen bai wok hat long stretim ol dispela skul i no kisim yet sabsidi mani, tasol bikpela samting em ol i mas givim ol stretpela skul sensus infomesen ol bin kisim long mun Mas long dispela yia, na benk akaun bilong skul yet. Tok klisa i stap olsem noken yusim praivet benk bilong ol man bikos Edukesen Dipatmen i no inap putim mani i go insait.

Mista Aihi i tok samting i stap nau long han bilong ol wan wan skul long mekim stretpela samting na skul sabsidi fi mani bai go insait.

Long wankain taim, Jeffrey Singer, i makim BSP benk, i tok maski dispela em i nupela samting long Edukesen Dipatmen, sistem i wok orait.

Na em i tokim Minista Aihi olsem tai mol mani i go insait long ol benk, ol bai stretim na putim hariap i go long ol wan wan skul akaun.

“Trensferim mani long masin i wok gut. Ol edministretiv samting tasol olsem skul sensus data na akaun em ol skul i mas stretim wantaim dispela 2,2000 skul na ol samting bai ron gut,” Mista Singer i tok.

Gavman bai bungim ol pablik na praivet skul

Veronica Hatutasi i raitim

GAVMAN i laikim gutpela na kwaliti edukesen long nesenel edukesen sistem bilong dispela kantri.

Edukesen Minista, Paru Aihi, i bin tok olsem long las wik Fraide taim em i toktok long gavman skul sabsidi mani i go long olgeta skul long PNG.

“Olsem Edukesen Minista,

mi laik lukim olsem samting gavman i laikim na i putim moa mani i go long edukesen i mas kamap. Dispela em long kwaliti edukesen.

“Gavman i gat bikpela wari long wanem, ol bikman i nogat bilip o luksave long edukesen sistem bilong kantri na ol i salim ol pikinini bilong ol long ol ovasis skul na tu, long ol praivet skul.

“Bikpela “gap” o hul i stap namel long praivet na pablik

skul long PNG, na olsem, yumi mas kamapim gut pablik edukesen sistem bilong yumi.

“O’Neill na Dion Gavman bai mekim samting long pasim dispela hul wantaim skul sabsidi sapot, i mas gat mani lonmg bildim na stretim ol klasrum na ol narapela skul building.

“I mas gat risets divisen bai gavman i sapotim na fandim gut,” Mista Aihi i tok.

Caritas na HYDC skul kisim helpim

TUPELA Teknikel na skul bilong ol yut long Mosbi i ken go hetim gut lainim wantaim helpim long ol kompyuta samting i ol i kisim long AusAID PNG.

Caritas Gels Teknikel Sekonderi Skul (CGTSS) na Hohola Yut Developmen Senta (HYDC) i bin kisim ol laptop, kompyuta na ol narapela IT masin samting i kam long ol woklain bilong AusAID PNG long las wik na tu, long wik i go pinis. Dispela em ol kompyuta ol

bin yusim long tripela kris-mas nau.

Fes Sekreteri bilong AusAID long PNG, Kanu Negi, i bin givim moa long 45 leptop, 44 doking stesen, 14-pela laptop beg, wanpela maus na tripela seva i go long Caritas GTSS.

Mis Negi i tok dispela ol masin em ol woklain bilong AusAID PNG i bin yusim long tripela yia nau tasol nau, AusAID i amamas long givim ol dispela masin i go long Caritas GTSS long

helpim ol sumatin na ol tisa long lainim na wok bilong ol.

Long wik i go pinis, bosman bilong AusAID long PNG, Stuart Schaefer, i bin givim ol namba wan hap long ol IT kompyuta samting i go long HYDC.

Long mun Jun dispela yia, AusAID aninit long Insentiv Fan i bin helpim Caritas GTSS wantaim K4.9 milian long sanapim wanpela skul laibreri, 4-pela nupela klasrum na ol haus slip bilong ol tisa.



GIVIM LONG HELPIM: Fes Sekreteri bilong AusAID long PNG, Kanu Negi, i givim ol kompyuta na ol narapela IT samting i go long ol sumatin meri long Caritas GTSS. Poto: AusAID Midia

Helt, edukesen, yut na meri long Isten Hailans kisim helpim

OL PIPEL long tripela distrik insait long Isten Hailans provins bai kisim gut helt na edukesen sevis bihainim K375,000 helpim gavman bilong Australia i givim i go long ol.

Dispela helpim mani i kam aninit long

Long las wik Fraide, bos bilong helpim program (AusAID) long PNG, Stuart Schaefer, i tok dispela mani i kam aninit long komyuniti developmen projek ol i kolim long “Strongim Pipel Strongim Nesen” (SPSN) program we ol i skelim bilong Isten Hailans Provins.

Na em bai helpim 6-pela komyuniti helt na edukesen projek long tripela distrik olsem Henganofi, Daulo na Kainantu.

Long tupela yia i kam, AusAID bai givim K50 milian aninit long SPSN long helpim ol sivil sosaiti na ol Non Gavman Ogenaisesen i karimaut ol komyuniti developmen projek we bai kamapim gut laip na sindaun bilong pipel.

Mista Schaefer i tok AusAID i amamas long sapotim ol ogenaisesen we i wok strong long kamapim gut helt bilong ol mama na ol pikinini na ol i ken stap laip, sapotim ol lain i gat HIV na AIDS, edresim pasin bilong paitim na bagarapim meri na

strongim moa pipel i go insait long ol wok developmen na mekim disisen, moa yet ol disebol lain.

Taim Dairekta bilong SPSN, Jeremy Syme, i givim ol mani i go long 6-pela ogenaisesen long Gorok, em i tok amamas olsem ol dispela projek i kamapim ol bikpela eria olsem helt, edukesen na jenda ikwaliti.

“Dispela ol mani em ol presen i kam long ol pipel bilong Australia na givim long gavman na pipel bilong PNG wantaim bikpela tingting long kamapim gutpela senis long laip bilong ol man, meri na pikinini long ol komyuniti we ol i tagetim long ol. Ol gren mani aninit long SPSN i luksave long komitmen na gutpela wok na lukaut bilong mekim wok we ol lain i kisim mani i gat long en na ol projek i ken karim kaikai long en,” Mista Syme i tok.

Long Henganofi, Herava Yut Grup bai kisim K73,206 i kam long AusAID long bun gim wantaim K8,246 bilong grup yet long karimaut Hani Projek. Fayantina Kibbutz Lokol Level Gavman i kisim K75,706 long sanapim Komyuniti Lening na Developmen Senta.

Meriaka Elementeri skul long Daulo Distrik i kisik K65,000 long helpim

K20,291 kontribusen bilong komyuniti long bildim tupela dabol klasrum taim Asaro Elementeri skul i kisim K70,083 we ol i bungim wantaim K13,563 bilong ol yet.

Barola Haus Mama Klinik i kisim K38,770 long bungim wantaim K3,700 bilong ol long strongim na trenim ol viles helt volandia na ol lain bilong ples yet husat i save helpim ol mama i karim pikinini, na projek bilong moa mama i karim pikinini na ol liklik pikinini i stap laip long Kamano LLG i ken kamap gut. Ol i givim narapela K52,324 i go long Kakamburu SDtrongim Komyuniti Klab long bungim wantaim K1,349 bilong ol yet na go hetim ol komyuniti awenes program long helti living, HIV, famili vailens na yusim krangi spakbrus na strongpela dring.

Dispela 6-pela grup i hap bilong 37 projek bai kisim ol liklik gren mani long AusAID na sainim ol agrimen namel long mun Ogas na Septemba. 12-pela ogenaisesen i bin kisim ol bikpela gren mani na sainim pinis ol agrimen long mun Me.

SPSN em i wanpela demokretik gavanens pat-nasip namel long ol gavman bilong PNG na Australia.



MAKIM LONG REDIM BUNG: Dispela bisop em ol eksekyutiv bilong FCBOC i bin bung long Nu Kaledonia las wik. **Poto:** Bisop Rochus Tatamai bilong Voice of Peter To Rot

Ol bisop bung long redim 2014 konprens

TUPELA de bung bilong ol eksekyutiv bilong Federesen bilong Katolik Bisops Konprens bilong Osenia (FCBCO) i bin toktok long ol wok redi long bung bilong ol long 2014 na tu, glasim ol wok kamap ol bin makim long 2010 bung.

Bung i bin kamap long Mont Mou long Paita, Nu Kaledonia we 8-pela bisop bilong 4-pela Konprens bilong ol Katolik Bisop long Osenia olsem Australia, Nu Silan, PNG na Solomon Ailan (SI) na CEPAC i makim ol narapela liklik ailan kantri long Pasifik i stap insait long en.

Ol bisop i bin sindaun long bung long tupela de, stat

long Ogas 14 na pinis long de namba 15.

Bisop Rochus Tatamai bilong Bereina Daiosis i bin makim ol bisop bilong PNG na SI long dispela bung.

Taim ol bisop i glasim ol samting i bin stap long 2010 ripot we ol i bin tok oraitim long karimaut long 2010 Federesen bung bilong ol long Sidni, Australia, ol bin painimaut olsem planti ol samting em ol i go hetim pinis. Wapela bilong ol em, singaut long wok bung wantaim long serim ol leksera long ol seminari na moa yet, long PNG na SI.

Narapela em long singaut long insurens kava long ol pater i wok long ol daiosis na

moa yet, moa gutpela helt ke long ol pater i wok long PNG, SI na CEPAC rijen.

Sampela long ol salens we ol bisop i bin skelim na glasim em long infomesen teknoloji o nupela rot bilong kisim na salim ol infomesen.

Ol bin lukim olsem planti ol samting bilong dispela graun (secularism) i wok long kamapim salens long sait bilong sios na dispela em i wapela bikpela salens bilong ol sios long Osenia.

Ol bisop i bin lukluk long "Yia bilong Bilip na Nupela Evanjelaisesen" na singaut i bin go aut long glasim dokumen o ripot we ol sios i redim pastaim long laip, stap na ol salens we sios i

bungim long Osenia rijen.

Ol bisop i bin stap insait long pestode bilong go antap long Heven bilong Mama Maria we ol bin selebretim long La Konsepsen Peris.

Long dispela bikpela selebren, ol bisop i bin gat sans long lukim long ai bilong ol yet we ol asples bilip manmeri long Katolik Sios insait long Nu Kaledonia.

Long dispela lotu taim tu, ol bisop i bin givim blesing long nupela dikon bilong hap.

Narapela bung bilong Federesen bilong ol bisop bilong Osenia rijen bai kamap long Wellington long Nu Silan long 2014.



Noken Pret

SAMPELA taim yumi no luksave sapos yumi pinisim de bilong yumi i pulap long wari na pret. Yumi pret, sapos yumi i no mekim gutpela long ai bilong bos, na yumi no mekim gut long tes, o long wokim intevyu long kisim nupela wok. Yumi wari long laip bilong yumi o laip bilong pikinini bihain taim. I gat planti moa wari na pret, yumi save bungim long laip bilong yumi. Tasol wanem mining bilong wari na pret? Bilong wanem yumi mas wari na noken pret long wanem samting?

"**Noken pret**", em i tok bilong Ensel Gabriel taim em i bringim tok i go long Maria. Planti taim Jisas i tokim yumi; "**Noken pret**", bikos i nogat wapela pisin i pun-daun long skai long laik bilong God. God i save gut tru hamas gras i stap long het bilong yumi. Bipo yumi autim prea bilong yumi, Em i save pinis wanem kain nid yumi gat long en. Velyu bilong yumi olsem manmeri i winim velyu bilong pisin.

God i gat plen long yumi wan wan taim yumi stap long bel bilong mama yet. Olsem na "**Noken pret**". Sapos yumi ridim Baibel gut, yumi bai painim 366 tok "**Noken pret**" i stap long Baibel. Em i min olsem yumi noken wari na noken pret long wapela yia (366 de).

Tingim gut! Han bilong God i gat bikpela na strongpela pawa stret, inap long mekim pipel bilong Israel i lusim ljiip na kamap fri. King David i kamap fri long ol birua bilong em, olsem na em i amamas tru long apim God. Wantaim 5-pela liklik ston tasol, liklik David inap long kilim bikpela na longpela na strongpela man Goliat bilong Gat. Long dispela David i mekim lain bilong Gat, husat i save bagarapim lain bilong David i pilim sem nogut tru.

Jisas i opim han bilong em antap long diwai kros na wantaim 5-pela sua bilong em, Jisas i mekim manmeri i kamap fri long sin na indai i save bosim manmeri. Olsem na, **NOKEN PRET!**

Jisas, em i God na man tru, em tu i gat "**pret pasin**" taim em i bungim indai i bilong em i kamap klostu. Wantaim pret, Jisas i prea; "**Papa bilong mi, sapos inap, mi laik bai yu rausim dispela kap long mi**" (Mt. 26:39). Jisas i save olsem em i mas karim olgeta hevi bilong sin bilong yumi. Olsem na em i mas dring kap bilong **pen na sin**, long mekim yumi i kamap fri na seif. Em i mekim wapela disisen long givim olgeta samting long han bilong God papa, na em i tok: "**Tasol yu noken bihainim laik bilong mi. Nogat. Yu mas bihainim laik bilong yu tasol**" (Mt; 26: 39)

Yumi mas lainim na kisim save long Jisas sapos yumi i gat wari o pret pasin. Ofaim olgeta wari na pret bilong yumi i go long Papa i stap long heven. Yumi noken pret long ol man inap long kilim bodi bilong yumi. Nogat. Yumi mas pret long God i gat pawa long kilim bodi na sol bilong yumi.

Olsem na yumi mas **pret long God tasol** na soim rispek bilong yumi long lo bilong em i stap pinis insait long Sios na komyuniti bilong yumi. Sapos yumi soim rispek long lo bilong em. Long dispela we yumi soim **LAIK** bilong yumi i go long God.

Stat long tude, wantaim nupela lait, gutpela taim na amamas, yumi **stopim pasin bilong PRET** insait long laip bilong yumi. Bikos God i no laik larim yumi yet i stap. Em i stap moa klostu long yumi. Em i save long yumi orait na yumi yet i save long yumi.

Olsem na **NOKEN PRET!**

OL PRINSIPOL BILONG

GUTPELA LIDASIP

wantaim Evangelist

OHARE JABERE

Strongpela lida

TAIM mi toktok long strong, mi no minim long strongpela het, maus, strongpela pasin o strongpela kain we bilong antap long arapela na daunim narapela. Nogat! Mi toktok long kain strong we yumi gat long insait (1Korin 3:16 -17 & 1 Jon 4: 4).

Taim yu gat dispela kain strong bilong Holi Spirit; bai pasin bilong pret na surik bek, guria nating nating long ai bilong ol manmeri bai no stap long yu.

Sapos yu laik kamap lida na go pas long toktok na mekim samting, yu mas gat strong bilong Holi Spirit insait long bodi, sol na Spirit bilong yu.

Yumi noken larim pilings, o bebi tingting o bebi pasin i kontrolim yumi.

(Manmeri i save kolim dispela kain lida olsem bebi sens lida)

Lida i mas gat strong bilong Holi Spirit we i mekim lida i sanap strong olsem lida long gutpela taim na taim nogut. Kristen prinsipel na pasin em i tru bilong kamap gutpela lida. God yet bai givim yumi strong long sanap na lidim ol manmeri igo long gutpela rot na pasin we em yet i laikim.

1: Lida em i man o meri husat i gat strong olgeta taim (em Holi Spirit)

2: Lida i man o meri husat i gat strong long bosim gut tingting, ol pil-ing na toktok bilong em we i noken larim ol piling bilong em i kontrolim em.

3: Lida em i man o meri husat i save long sanap na winim pret,

winim sem, winim toktok long helpim manmeri bilong em.

4: Lida em i man o meri husat i toktok na rausim pret, wari na tingting planti na tokim manmeri olsem God stap bai yumi ken mekim samting.

5: Lida em i man o meri husat i gat strong bilong kirapim em yet na kirapim arapela long sanap strong.

6: Lida em i man o meri husat i kisim tok bilong God na bilip na pas wantaim God olgeta taim.

Joshua 1: 6-9 i tok yu mas sanap strong na noken pret. Bai mi stap wantaim yu. (Dispela kain strong i save kam long God long helpim yumi olsem na manmeri i no save long God.



TOK PISIN NEWS

from Radio Australia

radioaustralia.net.au

Harim TOK PISIN long

Radio Australia

101.9FM

Port Moresby

Tok Pisin Service

6am - 7am 6080; 7240(KHz)

7pm - 9pm 5995; 6020; 9710; 1280(KHz)

Solomons PM i tok tenkyu long wok bilong RAMSI

PRAIM Minista bilong Solomon Ailans, Gordon Darcy Lilo, i bin givim tok amamas bilong em long ol gutpela wok bilong polis, soldia, na ol wokmanmeri long strongim wok bilong RAMSI long bringim gutpela sindaun long kantri bilong em.

Stat long 2003, lain Rijenal Asistens Misen long Solomon Ailans, em Australia i go pas long en, i bin halivim gut Solomon Ailans long strongim wok sekyuriti, loa na jastis.

Mista Lilo nau i mekim lukluk bilong em i go long Australia long toktok long ol tingting bilong stat givim bek ol dispela wok i go long ol asples yet long lukautim na was long ol wok sekyuriti.

Em i tok kantri bilong em i gat bikpela dinau long rijenal long gutpela wok i kamap.

“Long makim ol pipel na gavman bilong Solomon Ailans, mi laik luksave long strongpela bel na tingting bilong ol Australia manmeri, polisman na meri, na ami, na ol wanwok bilong ol long rijen husat i sevim kantri bilong mi,” em i tok. “Mipela i tok tenkyu long ol long strongpela tingting, sakrifais, na bikpela tok pilai na amamas tu.”

Na ol pipel i wok insait long RAMSI i kam long ol ami na polis long Tonga, Papua Niugini, Nu Silan, na ol arapela Pasifik Ailan kantri, em ol i memba bilong forum.

2012 bai makim tenpela yia em RAMSI i wok long Solomon Ailans.

Australia gavman i bin tok em i hop long kisim bek wok bilong militari long namba tu hap bilong yia.

Mista Lilo tu i bin givim tok sori bilong em i go long ol arapela opisa bilong RAMSI, em ol i givim laip bilong ol long wok ol i mekim olsem long Adam Dunning, husat i bin dai taim em i stap long wok long Solomon Ailans.

“Sampela taim, long ol dispela kain misin, ol asua i save kamap, na tude, mi mas givim luksave long pikinini bilong yupela i pun-daun – wanpela yangpela Australia protektiv sevises opisa – em leit Adam Dunning, husat ol i sutim na kilim em long taim em i mekim wok,” em i tok.

Long las de bilong em long dispela lukluk raun bilong em long Australia, Mista Lilo bai toktok wantaim Praim Minista Julia Gillard na Lida bilong Oposisen, Tony Abbot.

Pasifik spots

divelopmen i plen long lukluk long ol rural etlit

SAMOA i tingting nau long kirapim wanpela Insitiut ov Spot long redi long Rio Olimpiks, na PNG Spots Institiut i lukluk long PNG Gems long painim ol nupela spotmanmeri.

Olimpiik Gems London 2012 i pinis nau wantaim i no gat wanpela medal i go long ol kantri bilong Pasifik.

Dispela luksave long olimpiik dispela taim i sutim bel bilong SAMo lain olsem em it aim nau bilong redi gut long Rio 2016 Olimpiik Gems.

Magele Mauiliu Magele i tokim Redio Austrlaia em bai askim Kabinet long kisim tok orait long kirapim wanpela Insitiut ov Spot long trenim ol namba wan gutpela etlit.

Papua Niugini Nesenel Spots Institiut i bin kamap long yia 2006, na taim ol i kamapim ol progrem long liklik baset bilong en, em i nidim moa mani long kamapim gut planti samting long institiut.

Sif Eksekativ Opisa bilong PNG Nesenel Spots Institiut, Endris Kumbuwah, i tok long wankain taim, bai gutpela tu long Australia save lain long spots i givim halivim bilong ol.

Golf Klab long Augusta, US, i tok orait long namba wan meri memba

AUGUSTA Nesenel Golf Klab, nau tasol i pinisim 80 yia rul bilong ol man tasol i memba, taim em i tokaut olsem tupela meri bai kisim welkam olsem memba bilong klab.

Klab i bin bungim planti toktok long i mas larim ol meri nau long kamap memba, na nau ol strongpela askim i bin kam long Presiden Barack Obama na kendidet bilong ol Ripabliken, Mitt Romney i kam insait long dispela kros na askim olsem i taim nau long larim ol meri i kamap memba.

Olpela Sekreteri bilong Stet, Condoleeza Rice, na wanpela bisnis meri bilong Saut Kerolaina (South Carolina), Darla Moore, i kamap namba wan ol meri long kisim membasip.

“Dispela em i taim bilong amamas, na mipela i tok welkam long sekreteri Condoleeza Rice na Darla Moore olsem ol memba bilong Augusta Nesenel Golf Klab,” Klab Siaman Billy Payne i tok.

Mista Payne em bipo i bin kisim tok orait long larim em i toktok long husat bai memba, i no bin toktok tumas long wari bilong ‘jenda isiu’, na i bin tok tasol olsem em i bikpela samting long klab olsem Mis Rice na Mis Moore i mas gat wankain luksave olsem ol arapela kendidet.

“Luksave long sait bilong husat kendidet i orait, i stap hait na i save kamap long longpela taim,” em i tok. “Rot bilong oraitim Condoleeza na Darla i wankain olsem tasol.”

Na Mista Obama i bin toktok strong long Augusta Nesenel Klab long rausim dispela strongpela tambu bilong em taim em i tok long mun Epril olsem ol i mas larim ol meri long i go joinim dispela klab bilong ol man.

Tim Finchem, Komisina bilong US PGA Tua, tu i bin givim tok amamas bilong en long dispela senis.

“Lont taim nau we ol meri i makim wanpela long ol namba wan groa long pilai golf, dispela i salim gutpela luksave na toksave long spot bilong mipela,” em i tok.

Transperensi Vanuatu wari long Phocea korapsen

TRANSPERENSI Vanuatu i tok gavman i noken pasim maus bilong en long dispela hevi bilong bikpela bot ol i kolim long Phocea.

Transperensi Intanesenel Vanuatu i bin sutim long gavman olsem em i no mekim wanpela samting long stretim hevi bilong bikpela bot em ol i bin sutim tok long em olsem i bin wok long karim ol drak, na giaman paspot.

Ol ripot i kam long Pot Vila i bin tok tu olsem tupela palamen memba i bin stap long dispela bot taim ol imigresen, kastoms na kwarentin opisa i bin go insait long en.

Olsem na Presiden bilong Transperensi Intanesenel, Marie Noelle Patterson, i laik save long watpo tru na gavman i no mekim yet wanpela toktok long dispela.

Tripela Nu Silan soldia i dai long Afganistan, namel long ol, wanpela meri

NU Silan i tokaut long rausim kwik ol soldia bilong en long

Afganistan, bihainim dai bilong tripela soldia taim wanpela bom i pairap long sait bilong rot.

Nu Silan Difens Fos i tok dispela ol soldia i bin stap long laspela trak bilong wanpela lain konvoi bilong ol taim bom i pairap na kilim ol.

Dispela birua i bin kamap long not-is Bamyar Provins bilong kantri.

Taliban paitman i bin putim aut wanpela toksave olsem ol i bin kamapim dispela bom pairap, i no longwe long ples tupela Nu Silan soldia i bin dai tupela wik i go pinis insait long taun bilong Do Abe.

Praim Minista John Key i strong olsem plen nau bilong kisim aut ol soldia bilong en, i no kamap long dispela ol i kilim dai.

Em i bin tok namba bilong Nu Silan soldia i dai insait long Afganistan i kamap nau long 10, we ol nau i tingting long rausim 145 memba bilong ol insait long provinsal rikonstraksen tim insait long Bamyar.

Praim Minista Key i tok dispela nau bai kamap long stat bilong neks yia, 2013, na i no long pinis bilong dispela wan yia.

Ol muslim long Sidni i protes agensim Syria gavman

I BIN gat ol protes agensim Syria gavman long wanpela festival long wanpela mosk long Sidni.

Ol pipel long dispela protes i bin werfim ol flek long Lakemba Mosk long Sidni, i bin krai na singaut na toktok long plantu tausen pipel i bin lusim laip bilong ol long dispela 17 mun woa long Syria.

Presiden bilong Lebanon Muslim Asosiesen, Sameir Dandan i bin askim olsem gavman bilong presiden al-Assad i mas pinis nau long wok bilong en.

“Ol pipel i wok long karim hevi aninit long wanpela nogut gavman inap moa long 50 yia,” em i tok. “Yumi mas luksave long ol eksen ol Australia manmeri na Australia gavman i mekim, na mipela i laik bilip olsem ol bai mekim dispela yet long sapotim ol pipel bilong Syria.”

Misat Dandan tu i bin toktok long ol bagarap long ol Rohingya pipel long Burma, na i bin tokim planti tausen pipel em ol i stap long dispela bung olsem ol liklik lain ol Muslim i go het long bungim dai bilong ol long Burma.

Pastaim long en, Premia bilong Nu Saut Wels, Barry O’Farrell, i bin stap tu long dispela Mosk we

planti tausen ol Muslim bilong Australia i bin selebretim kaikai bilong Eid.

Mista O’Farrell i bin joinim planti tausen pipel em ol i wok long prea long makim Eid em festival bilong makim pinis bilong Ramadan.

Long taim bilong Ramadan, ol Muslim i nonap kaikai inap long 30 de, long san.

Olgeta han rot long Lakemba ol i pasim ol olsem planti pipel i ken kamap long prea na harim ol toktok i kam long bikpela pasto bilong ol.

Bikpela delegesen bai kamap long Forum miting

SAINA na Amerika, wantaim i redi long salim bikpela lain mausman bilong ol i go long Pasifik Ailans Forum long Kuk Ailans sampela taim long mun bihain.

Ol man i stap lukim dispela samting i bin tok Saina nau i stat apim nem bilong em long Esia na Pasifik tu i gat laik long apim wok-mak bilong em insait long rijen.

Long namba wan taim, Amerika i tingting long salim Sekreteri ov Stet Hillary Clinton i go long dispela miting long mun bihain.

Ekting Dairekta bilong Lowy Institiut bilong Australia bilong Melanesia Progrem, Annmaree O’Keeke, i bin tok dispela pasin bilong tupela kantri em i bilong soim husat long ol i gat strong.

“Em i soim strong bikpela tru long Beijing, olsem Washington i wok long strong yet insait long Saut Pasifik, we mipela i no lukim longpela taim tru,” em i tok.

Palamentri Sekreteri bilong Australia long Pasifik Afeas, Richard Marles, i bin givim tok amamas bilong em long tingting bilong Amerika long apim wokmak bilong em long rijen.

“Moa mipela i lukim long US insait long Pasifik, em i gutpela,” Richard Marles i tok. “I tru long laspela forum, US i bin gat delegesen inap long 50 manmeri i stap long Pasifik Ailan Forum, we i soim namba bilong US gut long Forum. Sapos Hillary Clinton i kam, em bai apim luksave bilong ol i go antap moa yet.”

Mista Marles i tok em i laik bilip olsem forum miting bilong dispela yia bai lukim Saina i orait long moa halivim i kam long rijen.

“Stap bilong Saina insait long Pasifik em i gutpela samting, na mipela i lukim ol i mekim moa developmen halivim wok,” em i tok.

PacificBEAT

4. 5. 6am & 4pm. 5pm including sport

Listen to Radio Australia

101.9FM Port Moresby

Radio Australia current affairs programme which focuses on island nations. Bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



Atiyafa bil bai nogut tru long PNG

NUELA memba bilong palamen no laikim bai gavman i westim taim long sekim olgeta stil pasin na bagarap we planti milien kina bilong kantri i lus long en.

Robert Atiyafa, memba bilong Henganofi, i laikim bai gavman bilong Peter O'Neill i noken westim taim long sekim ol ripot bilong ol mani i lus o paul insait long ol gavman opis na bisnis o ol kainkain projek.

Na tu ol hevi olsem ol lida na wokman i brukim loa na mekim samting.

Mista Atiyafa i tok olsem dispela bai westim bikpela taim bilong gavman long tromoi mani, na tu, no inap givim moa taim long mekim ol wok na stretim kantri long go fowet.

Em laik kamapim wanpela loa o bil long palamen long rausim olgeta kain ripot olsem we i bin stap pinis.

Sampela bikpela hevi o rekot we i bin kamap bipo em planti milien kina bin lus long Nesenel Providen Fan (NPF nau NasFUND),



moa long K120 milien bilong NasFUND go long Kokopo we husat bai bekim dispela mani, hevi bilong Julian Moti we balus bilong PNG ami bin hait na karim em long nait go lusim long Solomon Ailan, wok painimaut go insait long SABL o Spesel Agrikalsa Bisnis Lis we planti graun bilong ol asples bai go long wokim ol bikpela bisnis na projek na sampela bikpela hevi moa.

Plantil dil o plen bilong gavman we planti milien kina go aut long en em nogat wok painimaut bin kamap yet long kisim bek ol dispela mani.

Sapos tru tru Robert Atiyafa i kamapim dispela lo long palamen bai nogat wanpela man bai kisim kalabus o bekim bek planti bikpela mani bilong kantri ol bin hait na kisim.

Ol bai amamas nau bikos hevi na wari i pinis.

Tasol bikpela askim em sapos dispela loa i kamap na klinim olgeta pekato na doti bilong bipo, olsem wanem long ol nupela pekato o stil pasin we bai kamap long bihain taim.

Ol lain i save pinis long stilim o paolim bikpela mani bilong kantri bai kam bek gen na kisim moa yet bikos ol save pinis long rot bilong bihainim go bek na paulim moa mani.

Mi no klia sapos Robert Atiyafa i tingting gut pastaim long ol hevi na bagarap bai i kamap long bihain taim o nogat? Ating em laikim olsem wanem samting bin kamap pinis na lusim go na yumi go het wantaim nupela.

Tru tumas pasin stil na bagarap bai kamap moa yet tru insait long kantri na olgeta liklik manmeri long PNG bai les tru na ol tu bai mekim save long sait we inap bagarapim tru sindaun bilong planti gutpela mani bilong kantri.

Ol liklik man bai tok, ol bikman hait na kisim planti

milien kina na ol no go kalabus. Olsem na bilong wanem na bai lo bai kalabusim mipela long liklik K100 na K200.

Ating sapos paia i kukim wanpela bikpela stua o bisnis bilong Robert Atiyafa bai em tok lusim tingting, em liklik samting. Larim na yumi go het long narapela samting.

Gutpela long memba bilong Goroka Bire Kimisopa i toktok agensim dispela bil o loa wantok bilong em yet Robert Atiyafa laik kamapim long palamen.

Ating bai olgeta memba bilong palamen bai sapotim dispela bil o nogat? Sapos ol sapotim, lukluk gut na glasim pes bilong ol na luksave gut husat tru i sapotim dispela bil. Bikos ol tu gat skel insait long sampela bikpela paul na stil pasin pinis na ol laik klinim nem na rekot na stap fri.

Sori long PNG sapos dispela loa i kamap, na ol memba bilong palamen i sapotim. Ating bai stil pasin na paul bai kamap olsem wanpela naispela spot o gem long PNG we olgeta pipel laik pilaim.



KOMENTRI

Ogio givim gutpela skul

WOK politikis, i no bilong olgeta man, tasol ol memba i win long ileksen, nau i gat bikpela wok i stap. Na o i noken abrus.

Gavana Jeneral, Sir Michael Ogio, i givim planti gutpela skul tok long ol nupela memba bilong palamen.

Toktok em i givim, em i winim toktok bilong olgeta arapela gavana jeneral bipo.

I tru, olsem toktok bilong em i pulap long ol polisi na wok gavman bilong O'Neill-Dion i redi long kirapim. Oposisen, na tu, sampela ol arapela memba bilong pablik i lukim na harim toktok bilong em, i tok dispela tok em i mekim, em i no toktok GG i mas mekim, na nau, em i soim olsem nogut luksave bilong em i wan-sait pinis long gavman i stap nau.

Mipela i no lukluk tumas long dispela.

Samting mipela i lukim, em ol gutpela stia tok GG i givim long ol memba.

Em yet i save long ol birua ol memba i ken bungim, bikos em yet i bin memba bipo.

Tok stia bilong em long ol memba i mas holim strong bilip bilong ol, em i bikpela samting.

Plantil ol memba i winim ileksen, i bin pairap strong tru long gavman i mas senisim pasin, na kain kain ol samting we ol i tok ol bai go insait long palamen na mekim.

Tasol yumi no longlong. Plantil long ol dispela nupela memba i wok kalap bihainim tait pinis, taim wok bilong fomim gavman i kamap.

Pasin bilong wok memba, em i no bilong bungim mani bilong yu na hauslain bilong yu.

Em i no wok bilong lukautim wan-pisin, na givim wok long ol poro bilong yu.

Wok memba, em i hatpela wok moa, bikos yu makim ol pipel bilong yu.

Em i wok bilong givim luksave long ol sevis ol pipel i nidim long ol liklik ples i no save lukim pawa lait o helt sevis.

Sapos yu no was gut long ol birua bilong wok politikis, bai yu lusim planti samting.

Nem bilong yu i ken bagarap, yu ken lusim bikpela mani, na moa yet, yu ken pundaun long birua bilong laikim pawa, mani na biknem.

Noken abrus, mipela i tok. Holim strong bilip bilong yu, na bilip long bikman.

Em tasol inap stiaim yupela long wok bilong sevim pipel.



Published Weekly, Thursday, for
Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia
52 niuspepa

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K220.00

US\$110.00

US\$150.00

US\$210.00

General Manager
Elizabeth Konga

Editor

Neville Choi
Published at

Able Building Complex,
Sec 58 Lot 02,
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.



WOL NIUS LONG POTO...

Ol i painim traipela tit bilong Mamot long Jemani
DISPELA poto i kamaut long siti bilong Duesseldorf, na i soim wanpela tit bilong ol tumbuna bilong ol elefan, em ol Mamot. Dispela tit i stap insait long graun long wanpela hap graun long Westen Jemani long Ogas 21, 2012. Ol wokman i wok long digim graun i stap na rausim dispela 34 kilogrem wuli mamot tit we i moa long 10,000 krismas, ol siti opisal i tok.



Han i gat mining

AUSTRALIA Praim Minista Julia Gillard na prinsipal bilong olupela skul bilong Mis Gillard, Unley Hai Skul, Susan Cameron, i kisim poto wantaim ol 'han' long Palamen haus long Kenbera long Mande dispela wok. Ol piksa bilong ol han i makim 6,700 pablik skulna i makim sikspela mun bihainim long ol i autim Gonski ripot i bin glasim mani halivim i go long ol skul.

Skulim ol yangpela long jiosaiens

WANPELA giaman dainoso i wokabaut namel long ol manmeri long Jiosaiens Australia Open De long Symonston long ACT, long taim Nesenel Saiens Wik i kirap long Ogas 19, 2012.



Ol wail paia go kam long Spen

OL BIKPELA wail paia i wok long karamapim Spen. Kain kain wail paia i wok long kamap long Spen, bihainim bikpela san i kamap long hap long ol wik i go pinis.



Kisim bagarap

WANPELA mangi i gat 12-pela krismas tasol i silip long sia long wanpela haus sik insait long Sharr distrik bilong noten siti bilong Aleppo, long Ogas 14. Dispela boi, nem bilong em Samer Owais, i bin kisim bagarap taim wanpela skin bilong bom i paitim haus sik na em i wokabaut ausait long sait bilong rot. Em i brukim lek bilong em.

Em longlong o yu longlong tru

Jada Wilson i raitim

Long wanpela ples insait long Rigo provins i gat wanpela yangpela man (Mi no inap tokaut long nem) i save stap. Boi yah i save tok-tok tasol olgeta bung o ol yanpela i save sindaun, boi yah tu bai sindaun tasol em bai maus pas olsem ol longlong man na harim ol man i toktok o singsing na em bai sindaun isi tasol.

Ating em pasin bilong em, husat i save.

Olgeta manmeri long ples i save long dispela pasin bilong em. Long ples tu i gat wanpela bikman tru i stap, em i sekreteri bilong difen fos long dispela taim na tu em i dikon bilong haus lotu bilong ol ples.

Wanpela taim long Sande, olgeta manmeri go lotu. Dispela mauspas man tu i go na sindaun long fran bilong haus lotu klostu long pulpit na harim dispela bikman i kirapim lotu wantaim ol preis na wosip sinsing. Nau lotu i stat wantaim ol toktok bilong God na testimoni bilong ol manmeri olsem olgeta Sande.

Bihain long olgeta samting i pinis, bikman i mekim wanpela spesol anausmen. Bikos em i sekreteri bilong difen fos, em mas go long Rabaul long nekswik na stap long wanpela bikipela bung we olgeta ministra na ol arapela deliget na ol lain bilong Francis Ona (BRA) bai bung long pinis bilong Bogenvil kraises. So nekswik Sande lotu bai em no inap stap na wanem ol toktok o agenda bilong em, ol i mas lusim bilong em i kambek na stretim bihain.

Olgeta i harim na salim tok gut-lak long em bikos wok bilong em i bikipela tru long kantri bilong yumi, na tu, em i karim nem i kam long ples long em i bikman tu bilong kantri long sait bilong difens fos.

Mauspas em sindaun isi tasol... Long Tunde moning difens sekreteri i go kamap long ples balus (Olpela Jackson ples balus) long kar bilong difens fos wantaim ol kago bilong em na go insait long dipatsa launs na kirap nogut long lukim dispela mauspas i sindaun insait i stap.

Em i kirap na askim em long wanem na em lusim ples na kam long ples balus?

Boi kirap na tok, Aee, yu tok bai yu go long Rabaul so mi laik kam wantaim yu...

Bikman em paul na tok, Aiya, yu longlong o? Mi go wok, em wok bilong mi! Kamon, go bek long ples, yu stupid!! Het longlong!! Go bek long ples!!

Tasol boi em strongim kona bilong em na stap. Bikman i no bisi long em na go mitim ol arapela ministra na ol deleget husat bai flai go long Rabaul long dispela impoten bung.

Taim bilong kalap long balus

Dispela stori i pani liklik na i tru, bipo long taim Bogenvil kraises i laik pinis long en...



bikman wantaim ol deleget i kirap na soim tiket long kaunta na ol i wokabaut i go autsait long go long balus..klostu hapwe long balus bikman pilim olsem wanpela man i wokabaut klostu long em na tanim na kirap nogut long dispela mauspas boi i wokabout klostu long em. Lewa bilong bikman i kalap olgeta na lukluk i go bek long dipatsa get na tingting hau em kam insait na bikmaus isi tasol, Yu longlong idiot!! Hau yu kam insait na bihainim mi?!! Yu stupid man!! Em toktok olsem na lusim man ya na wokabaut hariap i go long balus na go insait na go sindaun long sia bilong em.

Tasol bikman i gat planti tingting long wok bilong na em lus tingting long mauspas na em sindaun..

Balus i tekov na lusim graun...Bikman i toktok wantaim ol deleget i stap na em tanim na laik toktok wantaim arapela deleget i sindaun baksait na kirap nogut gen long lukim mauspas i sindaun long baksait tru... Ai bi-

long em i op nogut tru na em sotwin tru...Em laik bikmaus tasol nek i pas.. Bikos tingting bilong em i save olsem mauspas i nogat tiket bilong balus, hau em i kalap kam insait we sekuriti i no holim em na tu hostes i no sekim em long boding pas bipo em i kam insait.

Dispela tingting i mekim sekreteri bilong difens fos i sotwin olgeta na i save olsem dispela mauspas longlong pikinini em kandere bilong em long ples na bai em mekim wanem long dispela asua. Balus i lusim graun pinis na flai i go long Rabaul nau.

Em i kaikai tit wantaim na toktok isi, Yu blari sit @%#!! Hau yu kam insait!!!

Boi yah bekim isi...masskii, inap,... mi kalap pinis, yumi go tasol....

Sekreteri i painim hat tru long dispela asua i kamap long en, so em i tokim em long lusim dispela sia em sindaun long en na kam sindaun klostu em. 'Yumi mekim bikipela rong pinis'.yumi brukim

loa bilong kantri pinis!!

Sekreteri em tuhat pinis na tokim em long karim brifkes na sindaun isi...Sapos hostes o ol man i askim long yu, bai mi tokim ol olsem yu nupela bodigad bilong mi...pasim maus na sindaun...

Ol i go kamap long Rabaul ples balus. Olgeta i kamaut na sekreteri tokim dispela longlong mauspas long wokabaut klostu tru long em wantaim brifkes bilong em.

Long teminol i gat sampela ol ples lain bilong ol husat i stap long Rabaul i wetim ol i stap. Ol i welkamim sekreteri na sekreteri amamas long lukim ol ples lain bilong em.

Em kirap na tok, mi kam wantaim dispela longlong mauspas tasol plis noken tokaut hau em kam na kalap long balus na kam wantaim mi..

Insait long teminol wanpela lapun mama i tok klia olsem ol i no kam lukim yu (Sekreteri bilong difens). Mipela i kam lukim dis-

pela longlong mauspas.

Sekreteri em paul olgeta nau. Tasol em nogat tiket?...Long semtaim longlong mauspas mangi rausim tiket na soim sekreteri...Sekreteri rausim brifkes bilong em long han bilong mauspas na klostu brukim het bilong mauspas.. "Yu bastet!!" Nekstaim noken giaman olsem!!! Na tu yu go bek long ples, noken tokaut long dispela samting i kamap!!! Harim!!

Tasol nogat, olgeta lain long ples i harim pinis dispela stori we longlong mauspas i giamanim bikman i kamap bikipela tru....

Tupela wik bihain long bung bilong Rabaul, sekreteri i go bek long ples na long Sande long em i go pas long lotu olsem dikon bilong ples.

Olgeta manmeri i sindaun isi tru na nogat toktok insait long haus lotu. Sekreteri pilim olsem olgeta i save pinis long dispela stori. Wantu sekreteri i kirap na tok, Dispela longlong mauspas we!!?

Olgeta kongregesen pairap long lap na singaut wantaim...

Digicel Star kam bek gen

Nicky Bernard i raitim

DIGICEL Star kam bek gen long dispela yia, dispela em bai namba tri yia bilong ol long mekim dispela singsing kompetisen, olsem na ol i kolim Digicel Star 3.

Tupela yia go pinis, Digicel i bin statim dispela kompetisen long bringim ol manmeri husat gat gutpela nek na save long singsing, na tu, ken raitim singsing bilong ol yet, long kam aut ples klia.

Planti bilong ol yangpela long Papua Niugini kisim sans bilong ol long soim stail nek na singsing bilong ol long dispela tupela yia go

pinis.

Nau, Digicel i kam bek gen na dispela em bai bikpela na strongpela kope-tisen stret. Planti bilong ol yangpela i putim nem pinis na Digicel Star kru bai go long ol provins ol makim long kamapim dispela kompetisen.

Long wiken go pinis ol bin stap long Alotau, wanpela grup bilong Alotau i winim Digicel Star 2 long 2011.

Dispela wiken bai ol go antap long kol ples Goroka long painim husat bai karim nem bilong Hailans long stap insait long Digicel Star 3. Bihain long Hailans, bai ol i go olsem long Niugini Ailan, ol lain Niugini Ailan we ol bai

kam bung long Kokopo long namba wan de bilong September. Bihain bai ol go long Lae long sait bilong Momase na pinisim long Pot Mosbi.

Musik man na produsa AK47 bai go pas long ol jas wantaim helpim bilong Moses Tau na Digicel Lorna McPherson, dispela ol tripela jas i save gut tru long wei bilong skelim singsing na wei ol manmeri bai sanap na singsing long fran bilong TV na ol manmeri.

Sapos yu wanpela bilong ol dispela lain bai resis long Digicel Star 3, yu mas prektis hat long glas bilong lukim pes na bai yu kisim strong long sanap long fran bilong ol dispela tripela jas.



Ol jas bilong Digicel Star 3...

Ol samsam long opim namba 9 palamen...



JIWAKA STAIL FLAWA...Ol UPNG sumatin bilong nupela provins, Jiwaka, tu i bin go singsing na danis long opim namba 9 nesenel palamen dispela wik Tunde long Palamen Haus. *Poto: Aja Alex Potabe*



TROBRIAN AILAN STAIL...Ol danis grup bilong Trobrian Ailan long Milen Be Provins i soim stail, danis na singsing wantaim. Dispela grup i bin pulim ai bilong planti manmeri husat i go lukim opening bilong namba 9 nesenel palamen long Palamen Haus dispela Tunde. *Poto: Aja Alex Potabe*

Pipel long Deyamos laikim rot

Paulus Tali i raitim

OL PIPEL bilong Deyamos lokol level gavman eria long Kabwum i singaut long memba bilong ol Bob Dadae, long pulim rot i go long olgeta hap long ples bilong ol.

Ol i tok klostu faivpela taim ol lain pipel long Derim eria i no lukim sevis bilong rot, na ol i laik save wanem hap manimak K.5 milian bilong Derim Yalamut LLG rot mani i go we.

Bahone Bekoene, wanpela

komyuniti lida long Kabwum i tok Dadae na tu, Prais Minista O'Neill i mas luksave long hevi bilong ol pipel bilong Kabwum, na givim wanpela sinia ministri long ol bai ol i ken lukim wok developmen i kamap.

Em i singaut long Mista O'Neill long kirapim wanpela wok painimaut i go long ol mani i go long Kabwum bilong stretim ol rot. Em i tok nau yet ol pipel i wokabaut tupela o tripela de wokabaut yet, na dispela i mekim laip bilong ol i hat moa.

Tobaining Junia em i gavana bilong ENB

Michael Novingu i raitim

PROVINSAL Asembli long Is Nu Briten i makim pinis Memba bilong Kokopo, Ereman ToBaining Junia olsem Gavana bilong Is Nu Briten.

Ol memba long provinsal asembli i votim em wantaim 31 vot long kisim sia bilong Gavana.

Memba bilong Gesel Open, Malakai Tabar, i kisim 5-pela vot.

Deputi Prais Minista na Minista bilong Inta-Gavman Rilesen Leo Dion, Tresari Minista na Memba bilong Kandep Open, Don Polye, wantaim ol memba bilong THE pati na ol arapela ministia i stap long Vunapope long lukim makim bilong ToBaining olsem Gavana.

Bihain long makim bilong em, Mista ToBaining i tokim provinsal asembli olsem em bai wok hat long kisim sevis i go long ol manmeri long provins.



ToBaining Jr Gavana bilong Is Nu Briten.

Em i tok em bai wokbung wantaim ol arapela memba bilong ENB long stopim pasin korapsen na karimaut wok wantaim trupela na stretpela pasin long kisim sevis i go long ol manmeri long provins long kirapim gutpela sindaun bilong ol insait long komyuniti.

Long wankain taim, Deputi Prais Minista Leo Dion i tok tenkyu long makim Ereman To-

Baining Junia olsem gavana.

Dion i tok pipel bilong ENB i gat bilip long em na votim em kamap memba bilong ol.

"Yu mas karimaut wok bilong yu wantaim trupela na stretpela pasin long kisim sevis i go long ol."

Em i singaut long fopela memba long palamen long ENB long wokbung wantaim ToBaining long kirapim ENB i go het.

Dion i tokim ol long ENB lus tingting long politiks na wokbung wantaim long stopim korapsen noken kamap long gavman bilong ENB.

"Yumi mas lukluk long kirapim wok developmen i go long ol elektoret bilong mipela we planti manmeri i stap long en," Dion i tok.

Dion i tok plen bilong karimaut wok i stap pinis we provinsal edministreta i redim pinis long karimaut wok developmen long ENB.

Moa yet em i tok, yumi mas apim 50% long humen risos bilong ENB bai ol helpim long karimaut wok long developim provins.

Dion i tok populesen bilong ENB i go antap.

"Mipela mas painim hap bilong sindaunim ol."

Em i tok olsem, yumi mas stopim raskol pasin noken kamap long ENB long pulim ol investa kam long provins.

Dion i tok bikpela wok yumi bai mekim long stretim ol haus sik, skul, rot na kirapim ol liklik bisnis i go long ol manmeri bai helpim sindaun bilong ol.

Moa yet Dion i tok tenkyu long pipel bilong ENB long i gat bilip long en long votim em lukim i holim wok olsem Deputi Prais Minista.

Em i tok, em bai wokhat long kisim sevis i go long ol manmeri bilong ENB long kirapim gutpela sindaun bilong ol long komyuniti bilong ol.



NEM: Berthlyn Huaffe

KRISMAS: 16(Meri)

ADRES: Passam Primary School, P.O. Box 521, Wewak East Sepik Provins

SAVE LAIKIM: Harim musik, pilai soka, pilai volibol mekim pani, kisim wara, watsim TV na ritim Baibel.

NEM: Jimmy N. Nimms

KRISMAS: 19 (man)

ADRES: Kilipau village, P. O. Box 56, Vanimo Sandaun Provins

SAVE LAIKIM: Raitim pas, ritim buk, harim musik, ring long fon na senisim presen.

NEM: Rodney Wauku

KRISMAS: 25 (man)

ADRES: C/- Andrew Api Vanimo CIS, PO Box 124, Vanimo Sandaun Provins

SAVE LAIKIM: Harim musik, pilai soka, watsim TV, swimming na painim stori.

NEM: Jason Sull

KRISMAS: 40 (Man)

ADRES: P.O. Box 248, Madang - Madang Provins

SAVE LAIKIM: Ritim Niuspepa, harim musik, kukim kaikai, wasim klos, wokabaut, trevol go kam long bisnis insait long PNG na painim poromeri long stap wantaim oltaim.

Yu ken ring long dispela namba, 7272 2843.

NEM: Jimmy Ekoda

KRISMAS: 20 (man)

ADRES: Sangara Vocational School, P O Box 170, Popondetta, Oro Provins

SAVE LAIKIM: Go lotu, pilai soka, pilai volibal, painim wanpela meri long maritim na stap wantaim oltaim.

NEM: Joe .K

KRISMAS: 24 (man)

ADRES: P O Box 1289, Goroka, EHP - 7360 3650

SAVE LAIKIM: Go lotu, pilai musik singim song, pilai spots, mekim pren na planti moa.

NEM: Gima Tanget

KRISMAS: 20 (meri)

ADRES: Bugandi Secondary School, PO Box 1225, Lae Morobe Provins

SAVE LAIKIM: Go lotu, ridim Baibel, mekim pren wantaim ol lotu manmeri, pilai ragbi,volibol and watsim TV(News).

NEM: Presley Tai

KRISMAS: 20 (Man)

ADRES: PO Box 28, Mondomil Minj, Jiwaka Provins

SAVE LAIKIM: Go lotu, ritim Baibel, ritim buk, stadi skul wok, pilai ragbi, harim musik na mekim poroman wantaim arapela.

NEM: Belany Haikope

KRISMAS: 19

ADRES: Don Bosco Araimiri Secondary, PO Box 159, Kerema Gulf Provins

SAVE LAIKIM: Ritim buks, pilai gems, go lotu long Sande, mekim pani wantaim poroman.

NEM: Bunau Dadis

KRISMAS: 31 (man)

ADRES: Raibus Security Service Ltd, PO Box 1337, Madang, Madang Provins - 7146 7257

SAVE LAIKIM: Go danis, Lukim TV, harim musik na painim gutpela poromeri long stap wantaim oltaim.

Raun wantaim Kanage olgeta wik

Ol lain bilong Kanage kisim kompens-esen moni long ol birua lain..Ol i salim K11,800 i go long lain bilong Kanage na Kanage i mekim toksave olsem ol i kisim moni pinis na em ritim aut total bilong moni ol i kisim... Tasol Kanage em ritim total moni krangi na klostu pait i kirap gen...



Mi no laik kamap namba tu meri

Dia Laipain

MI WANPELA mama bilong 4-pela pikinini. Em tripela yia nau taim man bilong mi i lusim mipela long stap long ples bilong em long narapela provins. Mi no harim wanpela tok i kam long em na mi wok long painim hat long lukautim ol pikinini bilong mitupela.

Mi gat bikipela bilip long God na mi putim olgeta hevi na wari bilong mi go long han bilong en na long bekim, God i helpim mi wantaim planti ol hevi bilong mi.

Long liklik taim i go pinis, mi bungim wanpela man husat i sore long sindaun mi stap long en. Long taim mi save long em na bihain long skelim em gut, mi painim olsem mi laikim em tru.

Hevi em, em tu i marit. Dispela man i askim mi long maritim em na long kamap namba tu meri bilong en we mi bai lukautim pikinini bilong mi na lukautim tu ol pikinini bilong em yet.

Dispela bai wok long em, long lukautim tupela meri na olgeta pikinini? Mi wok long traim long noken lukim em na traim tu long brukim dispela prensip bilong mitupela tasol em laik maritim mi yet.

Mi pundaun long dispela samting na dispela i banisim Kristen laip bilong mi.

Mi Paul Stap.

Dia Pren,

Tenkyu long rait i kam long Laipain. Mipela sore long harim olsem man bilong yu i lusim yu wantaim ol pikinini long go stap long provins bilong em yet.



Yu no harim wanpela tok long em na nau yu pilim yu kirapim laik long narapela man husat i sore long yu na ol pikinini bilong yu.

Dispela man i askim yu long maritim em na bai yu kamap namba tu meri bilong em. Na bai yu lukautim pikinini bilong yu wantaim ol pikinini bilong em tu.

Yu olsem Kristen i pilim olsem dispela kain prensip o marit bai i no nap wok bikos em bai gat tupela meri long lukautim wantaim planti pikinini. Olsem na yu wok long traim long noken lukim em na askim em long pinisim prensip tasol em laikim yu long kamap namba tu meri bilong em.

Yu ting long maritim dispela man yu bai rausim olgeta hevi bilong yu? Yu tingim tu olgeta wok yu bai mekim long lukautim meri bilong em, pikinini bilong tupela na pikinini bilong yu yet?

Mipela i tingim pilings bilong yu olsem yu les long stap yu wan na hevi yu wok long bungim taim yu lukautim pikinini bilong yu.

God i bin gutpela long yu olsem yu yet i tok. Mipela i strongim yu long go long ol felosip bilong ol meri na raun wantaim ol arapela na strongpela Kristen meri. Mipela save olsem gutpela

Papa bilong yumi bai i no nap mekim yu sore.

Yu traim long painim aut long ol pren o wantok long we man bilong yu stap? Em bai inap sapos yu ken go long ples bilong em long painim aut yu yet o nogat?

Mipela i strongim yu long go long sios pasto bilong yu na askim long stia taim yu wetim samting yu bai mekim nau.

Mipela laik strongim yu long pre long God long helpim yu long pinis lukim dispela man, na long helpim yu strongim prensip bilong yu wantaim ol sios wok na kisim bel isi wantaim ol Kristen pren.

Mipela i bilip olsem sapos yu stap wan long yu yet moa long ol Kristen pren o long sios, yu bai gat tingting long mekim ol rong disisen.

Baibel i tok insait Romans Septa 8 ves 28, "Na yumi save insait olgeta samting, God i wok long gutpela bilong ol husat i laikim em, husat i kisim singaut long karim aut wok bilong em."

Wok bilong God i gutpela long ol pikinini bilong em taim yumi wokabaut bihainim toktok bilong em na olgeta samting i kamap long taim em yet givim (Ecclesiastes Septa 3 ves 1).

Laipain.

Sapos yu gat wari, rait i kam long Lifeline, P O Box 6047, Boroko, NCD. Telipon: 3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

RADIO AUSTRALIA TOK PISIN PROGRAM
HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Spots
7.30PM Nius na Karen Afeas
8PM Helt
8.15PM Musik
8.30PM NIUS
8.40PM Spots Riplei
8.53PM Musik
9PM Stesen Pas

TUNDE - Morning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afeas
8PM Mama Graun
8.15PM Musik/Spots
8.30PM NIUS
8.40PM Helt Riplei
8.55PM Musik
9PM Stesen Pas

TRINDE - Morning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afeas
8PM Focus
8.15PM Musik/Spots
8.30PM NIUS
8.40PM Mama Graun Riplei
8.55PM Musik
9PM Stesen Pas

FONDE - Morning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afeas
8PM Youth
8.15PM Musik/Spots
8.30PM NIUS
8.40PM Focus Riplei
8.55PM Musik
9PM Stesen Pas

FRAIDE - Morning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afeas
8PM Wantok
8.15PM Musik
8.30PM NIUS
8.40PM Youth Riplei
8.55PM Musik
9PM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Wantok
8PM Lokal Ben
8.30PM Nius
8.40PM Musik/Chit Chat
9PM Stesen Pas

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Femili Blong Serah (Radio Plei)
8PM Lukluk Bek Long Wik
8.30PM Nius
8.40PM Musik/Chit Chat
9PM Stesen Pas

Logic Crew NGI Tour

pela mangi save raun na
skul wantaim.
Ol bai statim raun bi-
long go olsem long
Madang long lonsim dis-
pela namba tu albam bi-
long ol na bihain bai ol
pilai long indipendens de
long amamasim sampela
lain.
Long mun Oktoba bai
ol mekim Trade Wind

raun long ol Niugini Ailan
aninit long nupela dring
bilong Trade Winds ol
kolim long Columbus.

Dispela NGI raun bi-
long ol bai pinis long mun
Desemba long Bogenvil,
na bihain bai ol kam bek
long Pot Mosbi long stre-
tim rot bilong ol long go
pilal long Manus.

Ol de bilong ol long

pilai long NGI raun em:
 Kimbe long Oktoba 13;
 Kavieng long Novemba
 24; Kokopo long No-
 vember 30; na bai ol
 pasim long Buka long
 Disemba 8.

Dispela NGI raun em
 Trade Winds i sponsaim
 aninit long nupela drink
 bilong ol, 'Columbus Dark
 Rum'.



FONDE 23 OGAS, 2012	5:55 PM 6:00 PM 7:00 PM 8:00 PM 9:00 PM 9:00 – 9:40 9:50 – 10:30 10:40 – 11:15 11:20 – 12:00 12:00 PM 1PM – 3PM	G EMTV TOKSAVE G EMTV NATIONAL NEWS G RAIT MUSIK G RESOURCE PNG G SOCCKER EXTRA G HOT SPOT #20 G NRL FOOTY SHOW PGR ELITE MUSIC ZONE G EMTV NEWS REPLAY	tinues..... 1:00 — 1:40 1:50 — 2:30 2:30 — 3:00 3:00 PM 5:00 PM 5:30 PM 5:57 PM 6:00 PM 7:00 PM 7:30 PM 9:27 PM 9:30 PM 11:30 PM	GRADE 6 MATHEMATICS GRADE 6 SCIENCE DEPI G KIDS KONA 3.00 PM DORA THE EXPLORER 3.30PM NEW MACDONALD'S FARM 4:00PM THE SHAK 4:30PM KITCHEN WHIZ G TRAPPED G A FUNNIEST HOME VIDEO G CRIME STOPPERS G EMTV NEWS REPLAY G IN MORESBY TONIGHT G NRL ROUND #25 G EMTV TOKSAVE G NRL ROUND #25 G EMTV NEWS REPLAY	7:00 AM 7:30 AM 8:00 AM 8:30 AM 1:00 PM 6:00 PM 6:30 PM 8:30 PM 10:30 PM 12:30 AM 1:30 AM	G WAYBULOO G ULTIMATE GUINNESS WORLD G YOGA SUTRA EP# 7 Rpt... G AUSTRALIA NETWORK G ROUND 1- SANZAR RUGBY AUST. vs. NZLAND "REPEAT" G ROUND 1- SANZAR RUGBY SOUTH AFRICA vs. ARGENTINA G NATIONAL EMTV NEWS PGR ROUND 2- SANZAR RUGBY NZLAND vs. AUSTRALIA G NRL ROUND #25 Dragons vs. Warriors "delay" G NRL ROUND #25 Cowboys vs. Knights "delay" G EMTV NEWS REPLAY G NRL ROUND #25 Panthers vs. Titans "delay"	ARGENTINA vs. SOUTH AFRICA "LIVE" 7:30 AM G CHIT CHAT with Sir. Paulias Matane 7:35 AM G BLISSFUL BLOSSOM 8:00 AM G YOGA SUTRA #5 8:30 AM G BUSINESS PNG Repeat... 9:00 AM G MARTIN MYSTERY S1 #2 10:00 AM G RESOURCE PNG — Replay 11:00 AM G AROUND THE WORLD IN 85 12:00 PM G HILLSONG 12:30 PM G AUSTRALIA NETWORK 2:00 PM G NRL ROUND #25 Roosters vs. Tigers "Live" 4:00 PM G NRL ROUND #25 Rabbitohs vs. Eels "Delay" 6:00 PM G NATIONAL EMTV NEWS 6:30 PM G DIGICEL STARS 3 Ep#1 — 2015 Pacific Games Unveiling. 7:30 PM G 60 MINUTES 8:00 PM G Chit Chat — Rpt... 8:35 PM MAO Man on Fire 8:40 PM G HILLSONG Rpt.... 11:00 PM
		FRAIDE 24 OGAS, 2012					
	4.45 AM 5:00 AM 5:30 AM 3:00 PM 3.00 PM 3.30PM 4:00PM 4:30PM 5:00 PM 5:30 PM	G AUSTRALIA NETWORK G JOYCE MEYER G TODAY G CLASSROOM BROADCAST 3.00 PM DORA THE EXPLORER 3.30PM NEW MACDONALD'S FARM 4:00PM THE SHAK 4:30PM KITCHEN WHIZ G TRAPPED G A FUNNIEST HOME VIDEO	 4.45 AM 5:00 AM 5:30 AM 9:00 AM 9:00 – 9:40 9:50 – 10:30 10:40 – 11:15 11:20 – 12:00 12:00 PM 1PM – 3PM	 G AUSTRALIA NETWORK G JOYCE MEYER G TODAY G CLASSROOM BROADCAST GRADE 7 MATHEMATICS GRADE 7 SCIENCE GRADE 8 MATHEMATICS GRADE 8 SCIENCE G NEWS UPDATES CLASSROOM BROADCASTS con-	4:00 AM G AUSTRALIA NETWORK	5:00 AM G ROUND 2- SANZAR RUGBY	
				SARARE 25 OGAS, 2012		SANDE 26 OGAS, 2012	

TORO



BIABIA



KANAGE



TOKWIN

Ren bagarapim posta
PLANTI ol posta bilong ol kenidet long Pot Mosbi i bin wet long tupela de ren, dispela ol posta ol mekim long pepa, plani bilong ol ren i bagarapim nogut tru.
Dispela em mak bilong yusim narapela mani gen long mekim nupela, na taim bilong kepen tu em sot nau na planti ol kenidet wok traim long karamapim bikipela hap ples long kisim vot bilong ol manmeri.
Dispela ren long Mosbi bin wasim

pes bilong ol kenidet gut tru wantaim posta bilong ol, planti manmeri long rot i tok larim ren wasim pes bilong ol, taim bilong ileksen yumi lukim kainkain pes na taim ileksen pinis dispela ol pes ya bai go hait na ren no inap wasim ol gen.

Gutpela toktok kam long kempen

OL kenidet i wok long mekim ol gutpela toktok long taim bilong kepen, tasol ol dispela toktok bai karim kaikai bilong em sapos ol win long go long Waigani?
Dispela em bai askim bilong yumi

ol wanwan manmeri, dispela liklik piga bilong yumi ol lain bai makim long tupela minit tasol na namba yu kamapim pinis long vot. Dispela em no longpela taim laka, tasol dispela wari na laikim bilong long sevis yu ting bai yu kisim long tupela minit olsem yu makim piga bilong yu.

Tingting na save stap long yumi wanwan manmeri, na sapos tingting bilong yumi orait na mak bilong vot bilong yumi orait kaikai bilong em bai kam long tupela minit tasol sapos askim bilong yumi go long dispela man o meri yumi makim.

A	T	R	I	T	H	E	T	F	S	I	A	S	E	A
A	J	L	S	M	H	E	I	W	L	F	C	L	J	L
L	S	E	S	L	A	L	E	I	W	L	F	C	L	J
I	T	F	A	E	S	F	C	L	F	A	A	C	H	I
I	T	F	A	E	S	F	C	L	F	A	A	C	H	I
S	E	C	U	L	I	C	S	K	E	C	L	I	C	S
A	C	T	U	L	I	C	S	K	E	C	L	I	C	S
L	I	C	U	L	I	C	S	K	E	C	L	I	C	S
I	T	F	A	E	S	F	C	L	F	A	A	C	H	I
S	E	C	U	L	I	C	S	K	E	C	L	I	C	S
I	T	F	A	E	S	F	C	L	F	A	A	C	H	I
T	F	A	E	S	F	C	L	F	A	A	C	H	I	T
W	S	E	A	S	E	I	J	N	E	D	A	L	C	S
A	L	I	L	U	E	I	E	A	H	A	S	I	S	E

Painim ol dispela toktok bilong ron long balus:

BALUS	AIR NIUGINI	AIRLINES PNG	MAF
ISLANDS NATIONAIR	PLES BALUS	KAGO	TI
KOPI	JIUS	BISKET	SIA LET
SIA	TIKET	SEKIN	SEKYURITI
LAP JAKET	EA HOSTES	PAILOT	SUTKES

2		4	9	6		1		5
	3			8				
	8	1				4	9	
7			1	4			3	9
		3		9		2		
9	6			3	2			1
	2	7				3	6	
				7			1	
3		6		1	4	8		

2	7	4	9	6	3	1	8	5
5	3	9	4	8	1	7	2	6
6	8	1	5	2	7	4	9	3
7	5	2	1	4	8	6	3	9
4	1	3	6	9	5	2	7	8
9	6	8	7	3	2	5	4	1
1	2	7	8	5	9	3	6	4
8	4	5	3	7	6	9	1	2
3	9	6	2	1	4	8	5	7

Ansa bilong las wik Sudoku

Ansa bilong las wik Pasol

T	A	R	A	G	A	U	B	I	L	O	N	G	N	A	I	T
				S												
K				E					K	U	M	U	L			P
A				K	A	L	A	N	G	A	R				I	
A							A							S		
	A			K	O	K	O	M	O			S	I			K
	R			T												
G	U	R	I	A		A						A	N		K	O
	K									R					A	K
							R		G						V	I
							A					P	I	P	I	
				P	A	T	O	L		G			B		I	V
I				O		E				A		A		I		B
A				K	P							U	L			U
N				T						K	A	K	A	T	U	
A	O		I										S			A
K			A													
	W			S	U	B	G	N	O	L	I	B	L	U	A	P

EMTV Television Guide

11:30 PM	G <u>MTV NEWS – Replay</u>	5:00 PM	G <u>TRAPPED #5</u>	12:00 AM	G MIDDAY NEWSUPDATES	TRINDE 22 OGAS, 2012	5:57 PM	G <u>CRIME STOPPERS</u>	
		5:30 PM	G <u>A FUNNIEST HOME VIDEO</u>	1PM – 3PM	G <u>CLASSROOM BROADCASTS</u>		6:00 PM	G <u>EMTV NEWS REPLAY</u>	
	MANDE 20 OGAS, 2012	5:57 PM	G <u>CRIME STOPPERS</u>	1:00 – 1:40	GRADE 6 MATHEMATICS	4.45 AM	G AUSTRALIA NETWORK	7:00 PM	G <u>THE WORLD AROUND US</u>
4.45 AM	G <u>AUSTRALIA NETWORK</u>	6:00 PM	G <u>NATIONAL EMTV NEWS</u>	1:50 – 2:30	GRADE 6 SCIENCE	5:00 AM	G <u>JOYCE MEYER</u>		
5:00 AM	G <u>JOYCE MEYER</u>	7:00 PM	G <u>NRL ROUND #24</u>	2:30 – 3:00	DEPI	5:30 AM	G <u>TODAY</u>	8:00 PM	G <u>PENN & TELLER – FOOL US</u>
5:30 AM	G <u>TODAY</u>		Dragons vs. Cowboys “Live” Fox...	3:00 PM	G <u>KIDS KONA</u>	9:00 AM	G <u>CLASSROOM BROADCAST</u>	9:00 PM	G <u>LEGENDS OF THE SEEKER – S2/Ep#9/22</u>
9:00 AM	G <u>CLASSROOM BROADCAST</u>	9:00 PM	G <u>TOK PIKSA</u>		3.00 PM DORA THE EXPLORER	9:00 – 9:40	GRADE 7 MATHEMATICS		
9:00 – 9:40	GRADE 7 MATHEMATICS	9:30 PM	G <u>SPORTS SCENE</u>		3.30PM NEW MACDONALD’S FARM	9:50 – 10:30	GRADE 7 SCIENCE	10:00 PM	G <u>NRL ROUND 23 HIGHLIGHTS</u>
9:50 – 10:30	GRADE 7 SCIENCE	9:57 PM	G <u>EMTV TOKSAVE</u>		4:00PM THE SHAK	10:40 – 11:15	GRADE 8 MATHEMATICS	11:00 PM	G <u>EMTV NEWS REPLAY....</u>
10:40 – 11:15	GRADE 8 MATHEMATICS	10:00 PM	G <u>EMTV NEWS REPLAY</u>		4:30PM KITCHEN WHIZ	11:20 – 12:00	GRADE 8 SCIENCE		
11:20 – 12:00	GRADE 8 SCIENCE	11:00 PM	<u>AUSTRALIA NETWORK</u>	5:00 PM	G <u>TRAPPED #6</u>	12:00 PM	G <u>EMTV MIDDAY NEWS UPDATES</u>		
12:00 – 12:00	GRADE 8 SCIENCE			5:30 PM	G <u>A FUNNIEST HOME VIDEO</u>	1PM – 3PM	G <u>CLASSROOM BROADCASTS</u>		
12:00 AM	G MIDDAY NEWS UPDATES		TUNDE 21 OGAS, 2012	6:00 PM	G <u>NATIONAL EMTV NEWS</u>	1:00 – 1:40	GRADE 6 MATHEMATICS		
1PM – 3PM	G <u>CLASSROOM BROADCASTS</u>			7:00 PM	G <u>HAUS & HOME #19</u>	1:50 – 2:30	GRADE 6 SCIENCE		
1:00 – 1:40	GRADE 6 MATHEMATICS	4.45 AM	G <u>AUSTRALIA NETWORK</u>	7:30 PM	G <u>BUSINESS PNG EP#12/16</u>	2:30 – 3:00	DEPI		
1:50 – 2:30	GRADE 6 SCIENCE	5:00 AM	G <u>JOYCE MEYER</u>	8:00 PM	PGR <u>TERRA NOVA S1 – Ep# 2/13</u>	3:00 PM	G <u>KIDS KONA</u>		
2:30 – 3:00	DEPI	5:30 AM	G <u>TODAY</u>	9:00 PM	G <u>LEGENDS OF THE SEEKER S2</u>	3.00 PM DORA THE EXPLORER			
3:00 PM	G <u>KIDS KONA</u>	9:00 AM	G <u>CLASSROOM BROADCAST</u>		Ep#8/22	3.30PM NEW MACDONALD’S FARM			
3.00 PM DORA THE EXPLORER		9:00 – 9:40	GRADE 7 MATHEMATICS	10:00 PM	PGR <u>HAUNTED HOMES #7/8 –</u>	4:00PM THE SHAK			
3.30PM NEW MACDONALD’S FARM		9:50 – 10:30	GRADE 7 SCIENCE	11:00 PM	G <u>EMTV NEWS REPLAY</u>	4:30PM MR. MAKER			
4:00PM THE SHAK		10:40 – 11:15	GRADE 8 MATHEMATICS	12:00 AM	G <u>AUSTRALIA NETWORK</u>				
4:30PM KITCHEN WHIZ		11:20 – 12:00	GRADE 8 SCIENCE			5:00 PM	G <u>TRAPPED #7</u>		
						5:30 PM	G <u>A FUNNIEST HOME VIDEO</u>		

Program bai
senis long taim
bilang en..

Program bai senis long taim bilong en..

IPBC mas mekim winmani long kirapim kantri

Aja Alex Potabe i raitim

Indipenden Pablik Bisnis Koporesen (IPBC) em i wanpela namba wan bisnis han bilong gavman, we em i ken senisim o kirapim dispela kantri sapos gutpela lida na stretpela wokman i ronim.

IPBC i no bin mekim winmani long 10-pela yia olgeta, tasol em i save kisim mani long gavman long helpim wok bilong en. Dispela pasin mas stop, na IPBC i mas mekim winmani long kirapim PNG.

Dispela em i toktok i kam long Sir Mekere Morauta taim em i laik lusim IPBC long han bilong nupela Pablik Entaprais Minista, Ben Micah, las wik Fraide taim ol i mekim henova-tekova seremoni.

Sir Mekere, husat i bin stap bipo minista bilong Pablik Entaprais aninit long O'Neill-Namah gavman, na tu wanpela man husat i bin kamapim IPBC, i tok dispela bisnis han bilong gaman em i wanpela namba wan bisnis bilong gavman, we em inap

long mekim moa mani long helpim gavman long kirapim dispela kantri.

"Tasol ol stet on entaprais (SoE) o ol arapela haus bisnis bilong IPBC olsem Telikom, BeMobile, PNG Pawa na Moto Viakol Insurens Limited (MVIL) i no save mekim winmani. IPBC laik dai tasol taim O'Neill-Namah gavman i makim mi minista, mi sevim laip bilong en, na nau em i kirap na stap gut," Sir Mekere i tok.

Em i tok nau salens em i stap long han bilong nupela minista, Ben Micah, long pinisim ol hap wok em i no bin pinisim.

"Mi risain long nesenel politiks na pablik laip tasol mi redi tasol long helpim yu sapos yu nidim sapot, save na ol ekpiriens bilong mi. I no gutpela long mi holim ol dispela save na ekspiriens na dai wantaim. Olsem na mi mas skelim long gutpela bilong kantri bilong yumi, PNG," Sir Mekere i tok.

Micah, husat i bin wok wantaim Sir Mekere taim ol i

laik kamapim IPBC, i tok em bai larim IPBC i operet olsem wanpela independen kampani.

"Yes, IPBC em i kampani bilong gavman tasol politiks i noken i go insait long en. Mi bai larim IPBC i stap autsait long politiks bilong Waigani. IPBC bai ron olsem wanpela independen kampani o haus bisnis," Micah i tok.

Em i tok taim em i bin stap bos bilong Praivetasesen Komisin aninit long Sir Mekere taim em i bin stap praim minista, em i bin laikim IPBC long mekim winmani, tasol politiks tasol i bin go insait na bagarapim sistem bilong dispela namba wan haus bisnis bilong gavman.

Micah tok em bai pinisim ol hap wok Sir Mekere i lusim na go, na wantaim sapot bilong ol wan-wan bos bilong SoE, IPBC i ken kamap wanpela strongpela kampani, we winmani em i mekim i ken go long kirapim haus sik, skul, rot na bris, pawa na wara saplai, na senisim laip bilong pipel.



Sir Mekere i lusim IPBC long han bilong nupela minista, Ben Micah.

OTDF makim nupela Sif Opereting Opisa na Sif Progrem Opisa

OK TEDI Dvelopmen Faundes (OTDF) i makim Geoffrey Fahey olsem nupela Sif Opereting Opisa (COO) na Dokta Miok Komolong olsem nupela Sif Progrem Opisa.

OTDF Sif Eksekutiv Opisa (CEO) Ian Middleton i tok dispela tupela man bai nau kamapim OTDF long karimaut gut ol sastenebel wok long insait ol komyuniti aninit long Ok Tedi Komyuniti Main Kontinuesen Agri-men (CMCA).

"Tupela Fahey na Dokta Komolong wantaim i karim i kam moa bisnis dvelopmen ekspiriens isniat long PNG, we dispela i ken helpim OTDF i givim sevis gut long ol pipel na kirapim laip bilong ol pipel bilong Flai River na

Westen Provins komyuniti," Middleton i tok.

Wantaim ol ekspiriens bilong Fahey i gat long lenona dvelopmen, menesmen na long praimer prodaksen sekta, Middleton i tok dispela bai helpim OTDF long painimaut ol sans long agrikalsa, laipstok, na long dvelopim o groim senta long Westen Provins.

Bipo long em i joinim OTDF, Fahey i bin stap Menesing Dairekta bilong Lihir Bisnis Sevis na Jeneral Menesa, Koporet Afes na Agribisnis wantaim Trukai Indastris. Em i Bot Siaman bilong Nesenel Agrikalsa Kwarintin na Inspeksen Atoriti (NAQIA), na Siaman bilong Bris Kanda Gavning Komiti.

Dokta Komolong em i

agrikalsurelis o save man long wok agrikalsa, husat i bin wok wantaim AusAID aninit long Agrikalsa Risets na Dvelopmen Sapot Fasiliti. Dokta Komolong bai go pas long dvelopim OTDF Monitaring na Evaluatesen Polisi na ol wok plening bilong bihain taim.

"OTDF em i groa hariap tru na, em i namba wan long mipela i bihainim na skelim olsem wanem mipela i wok long mekim ol wok long komyuniti. Olsem na Dokta Komolong bai sekim na skelim wok bilong OTDF," Middleton i tok.

Dokta Komolong i bin stap leksera long Agrikalsa Dipatmen bilong PNG Yunivesiti ov Teknoloji (Unitech) long Lae.



OTDF CEO Ian Middleton (namel) i sindaun wantaim nupela CPO, Dokta Miok Komolong (lephan) na COO Geoffrey Fahey (Raithan).

K16m long helpim Nu Ailan infrastraksa projek

NESENEL Gavman bai yusim K16 milian mekim wok mentenens projek long ol infrastraksa long Nu Ailan provins long pinis bilong dispela yia.

Mani bilong karamapim dispela ol projek i kam aninit long 2011/2012 Dvelopmen Baset.

Aninit long Pablik Invesmen Progrem (PIP) aninit long Lihir na Simberi Main, Nesenel Gavman i fanim 22 infrastraksa mentenens projek long sait bilong helt na edukesen long 18-pela mun i go pinis.

Mineral Risos Atoriti (MRA) i karimaut ol dispela projek. Ol i karimaut pinis bikpela wok mentenens long Namatanai Rurel Haus Sik, 17 haus bilong ol pablik sevan na polis stesen long Konos, na haus bilong wok manmeri bilong Lemekot Helt Senta.

Mani bilong ol dispela projek i kam long Nesenel Gavman aninit long tupela MoA agrimen bilong Lihir na Simberi, we gavman i bin tok promis long mekim.

EkingMenesing Dairekta bilong MRA, Philip Samar, i tok MRA i amamas stret bikos ol dispela kain projek long ol ples we risos projek i stap long en, olsem Nu Ailan, i wok long kam gut, na i tok ol pipel bilong Nu Ailan mas amamas long dispela tu.

"Mi bilip ol pablik sevan long Konos i nau amamas long stap long ol nupela haus, i no olsem bipo bagarap haus ol i bin stap. Mi bilip dispela bai givim ol strong long wok gut," Samar i tok.

Em i tok Lihir MoA rivi i stat pinis, na em i bilip olsem kampani, gavman na papa-graun wantaim bai amamas long lukluk gen long dispela

MoA long larim gavman i karimaut ol projek em i bin lus tingting long mekim aninit long dispela nupela MoA.

Long soim gavman olsem MRA i yusim gut ol mani em i bin kisim long Nesenel Plening na Monitaring Dipatmen long mekim ol dispela metenens projek, MRA i bin kisim wokmeri bilong dipatmen, Eileen Saiyomina, i go Nu Ailan long larim em i lukim na sekim ol projek.

Saiyomina i bin go lukluk raun long haus bilong ol wok manmeri long Lemekot Helt Senta, ol haus bilong pablik sevan long Konos, Kimadan Helt Senta, na Namatanai Rurel Haus Sik, na ol arapela projek tu.

Saiyomina bai kamapim wanpela ripot long lukluk bilong en long ol dispela projek na bai givim long gavman, aninit long dipatmen bilong en.



EM YA: Projek Enjinia bilong MRA, Yako Punin Minaro (raithan) i soim Saiyomina bilong Nesenel Plening na Monitaring ol nupela haus bilong ol Lemekot Helt Senta wok manmeri.



HAUS PRAIS GO ANTAP...Bikos nogat loa, polisi o gavman ejensi i stap long lukautim ol ril istet indastri, prais bilong haus i go antap long Mosbi siti na sampela hap bilong kantri. *Poto: Aja Alex Potabe*

Nogat gavman loa, polisi o ejensi lukautim ril istet indastri long PNG

Aja Alex Potabe i raitim

HAUS em i namba wan samting long laip bilong manmeri bikos nogat wanpela man o meri i save slip autsait long strit o antap long diwai.

Tasol mani mak long baim o rentim haus long PNG em i go antap tru bikos i nogat wanpela loa, gavman polisi o

gavman ejensi i lukautim ril istet (real estate) indastri long PNG.

Siaman bilong Nesenel Hausing Komisin (NHC), Benny Kokoka, i tok planti manmeri long ol siti olsem Mosbi, Lae na Hagen i slip kirap long ol setelmen bikos ol i nonap long peim bikipela mani long slip long gutpela haus.

“Nogat wanpela man i

lukautim o tokim ol ril istet kampani long sasim o senisim ol mani mak o prais bilong ol ril istet indastri insait long kantri.

“Prais bilong ol haus long baim na rentim i go antap bikos moa manmeri o kastoma i laikim. Taim kastoma i laikim, mani mak i go antap. I nogat wanpela loa bilong dispela i stap long kantri,” Koroka i tok.

Koroka i tok NHC i mas kamapim moa kompetisen o mekim moa haus long salens wantaim ol ril istet kampani, na long larim ol liklik pipel bilong PNG i gat gutpela haus long slip long skel mani mak.

“Gavman i mas wokbung wantaim NHC long larim moa haus i kamap. Dispela bai kamapim kompetisen, na ol ril istet kampani bai dau-

nim prais bilong ol haus bilong ol, taim gavman, aninit long NHC i mekim moa haus,” Koroka i tok.

Long stretim dispela asua, NHC i nau kamapim wanpela kampani o bisnis han bilong en pinis.

Nesenel Hausing Istet Limited (NHEL) em i nupela kampani bilong NHC. NHEL bai resis wantaim ol arapela ril istet kampani in-

sait long kantri.

Wok bilong dispela nupela kampani em long mekim moa haus na sasim skel mani mak, we ol liklik manmeri o ol midel klas wok manmeri tu bai isi long slip long gutpela haus.

Taim dispela i kamap, em bai gat sans long larim ol ril istet kampani i daunim prais bilong haus long rent na salim wantaim.

Denmark groim rais long sapotim famili



Model rais fama long Erima, Denmark Tauraba

James Kila i raitim

PLANTI ol pipel nau long ples Bom insait long Astrolabe Be i wok long groim rais long gaden bilong ol yet na wok long milim na kaikai wantaim famili bilong ol long ples.

Dispela ol fama i no moa baim rais long stua. Ol i kisim rais long gaden bilong ol na bungim i stap i go taim ol i laik kaikai ol i save go milim na kaikai.

Wanpela long ol dispela fama em Denmark Tauraba, na em i save stap klostu long ples Erima.

Dispela fama em man tru long promotim lokal rais bilong Madang stret em ol i kolim “Magic Marasin”.

Dispela lokal rais paket em ol lokal fama, long Madang yet i groim na pekim na salim long ol yet. Ol i gat paket bilong ol yet we i gat piksa bilong Madang na i promotim prodak bilong Madang stret.

Denmark em bilong Usino eria tasol em i go stap long blok long Bugati long-taim tru na em kamap olsem wanpela lokal man na bikipela pes tru long Erima eria.

Denmark yet em wanpela

gutpela fama husat em rais model fama bihain long tren-ing em i kisim long ol teknikal saveman bilong Japanis Intanesenel Koporesen Ejensi (JICA) aninit long wok bung wantaim Madang Dipatmen ov Agrikalsa na Laipstok.

Demark i tok rais isi long groim long gaden, na i gat kain kain ol varaiti o kain kain rais long groim we i ken go gut long wanem graun ol famas i laip planim long en.

Em i tok olsem ol famili bilong fama i mas wok bung wantaim long lukautim rais long gaden bilong ol long sait bilong widim ol rausim grais na gu klinim eria oltaim.

Em i tok bihain long tripela o sikspela mun bihain wanem kain rais fama i planim, ol sid bilong rais bai i redi nau long pikim long gaden. Bihain long fama i bungim rais i stap em i mas putim long beg na larim long haus.

Denmark i tok Madang provinsal gavman na tu ol memba long wan wan distrik i mas sapotim ol lokal rais famas long go insait long kamapim moa prodaksen long helpim sindaun bilong ol long ples. Moabeta, ol MPs mas bai ol rais miling masin na larim long wan wan distrik long strongim wok bilong ol rais fama.



KAIN KAIN KALA KOKONAS:

Piksa ya i soim ol kain kain mama na papa kokonas we PNG Kakao Kokonas Institiut (PNGCCI) i save groim long Omuru na Murunas long Madang provins. CCI i gat sid gaden bilong em i stap long Omuru long hap bilong Amele eria, na wok long groim na kamapim gutpela kokonas i stap long Murunas long not kos rot long Madang. Dispela poto i soim ol kain kain kokonas ol i kolim Malayan Red Duof na Malayan Yellow Duof na tu ol narapela man o papa kokonas we ol saveman i save yusim long groim ol kokonas. Dispela sid gaden long Omuru em wanpela long tupela sid gaden i stap long Papua Niugini. Narapela kokonas sid gaden i stap long Manebo klostu long Kep Rodney long Sentral provins. *Poto na stori: JAMES KILA*



Aweanes Miting bilong Nupela Salfarik Esid Plent bilong Ramu NiCo kamap long Basamuk

ENVAIROMEN aweanes miting long toktok long nupela Salfarik Esid Plent bilong Ramu NiCo i bin kamap long Ogas 16 long Murr Konferens Rum long Basamuk.

Dispela miting em long givim tingting long ol stekholda na ol lokal pipel long Basamuk eria long wanem samting dispela Salfarik Esid Plent na tu wanem kain smuk na marasin samting i ken kamaut long en.

Ol lain husat i go pas long kontrolim miting em ol Ramu NiCo ofisa bilong Helt, Sefti na Envairomen (HSE) wantaim sapot bilong Komyuniti Afes Dipatmen ofisas.

Ol mausman bilong Basamuk Lenona Asosesin (LOA), ol 9-pela mausman bilong 9-pela viles we i stap arere long Basamuk Rifaineri na tu ol lain ofisa bilong Madang Provinsal Gavman i bin kamap long dispela miting.

Long makim maus bilong Ramu NiCo, CA ofisa Mathew Lem i tokaut long tupela lain ofisa bilong Madang Provinsal Gavman husat i stap long dispela miting. Bihain long en Mista Lem i askim HSE Envairomen Ofisa, Jennifer Goari long mekim toktok long Envairomen Aweanes Plen yusim pawa-poin presentesen.

Miting i tokaut olsem ol HSE lain i wok nau yet long kamapim wanpela buk bilong Operesen Envairomen Monitoring Plen (OEMP). Dispela buk o manual bai i stap long tripela tokples, em long Inglis, Tok Pisin na Saina tokples (Mandarin)

Lod Komising aweanes bilong slari graun long KBK i go daun long Basamuk i bin kamap pinis, tasol nau Projek i wok long go insait long karimaut aweanes bilong Komisining bilong nupela Salfarik Esid Plent.

Salfa em yelopela sabstensi o kain marasin. Ramu NiCo i bringim long narapela kantri i kam long Basamuk Rifaineri long meltim long

yusim long kamapim nikel na kobalt. Dispela em tupela bikpela prodak Ramu NiCo i laik kamapim na salim i go ovasis. Miting i tokaut tu olsem salfa pauda em i ken kamapim paia hariap tru.

Miting i tok olsem notis leta na plen bilong wokim kamap dispela Salfarik Esid Plent em Ramu NiCo i salim pinis i go long Dipatmen ov Envairomen na Konsevesin (DEC) long kisim tok-orait. Taim stret bilong komisining bilong esid plent em Ramu NiCo i no tokaut yet, tasol i luk olsem pinis bilong dispela mun.

Insait long miting ol HSE ofisa i toksave long ol lain husat i bung olsem long taim bilong komisining bilong Salfarik Esid Plent, wanpela kain smel bai kamaut. Dispela em taim salfadaioxaid i go aut long bikpela simni o paip bilong simuk em 100 mitas antap. Miting i tok olsem, dispela smel ya i no gutpela long ol pipel, animal na tu ol diwai samting. Tasol HSE Dipatmen bilong Ramu NiCo bai wok strong long daunim wanem kain ol hevi i kamap long envairomen.

Olsem na long dispela sait, ol Ramu NiCo wokman husat bai karimaut sevei long nois bai wok olgeta de long Jangag na Duman viles. Ol taim bilong wok em 6-aia long olgeta de insait long wanpela wik. Wanem risalt i kamaut long dispela tupela viles bai lukluk long surukim monitoring ples i go long Ganglau na Mindre viles.

Antap long dispela tu, miting i tokaut olsem aweanes i go long ol draiva bilong ol trak long kontrolim spit bilong ol na tu wara trak bai muv i go kam long kapsaitim wara long rot long stopim das olgeta de.

Long toktok bilong em, Jason bilong HSE i tokim miting olsem olgeta lain i welkam long joinim dast na nois monitoring tim sapos ol i laik lainim sampela wok. Em i tok tu olsem smel nogut na smuk tu bai kamaut, tasol dispela em yumi

i no inap abrusim.

Superintenden bilong CA long Basamuk, Jacky Wang i kisim maus bilong Ramu NiCo Menesmen (MCC) long tok tenkyu long dispela kombain aweanes miting.

Mista Jacky Wang i tok Ramu NiCo Projek em bilong olgeta lain stekholda na ol i mas laikim dispela projek na amamas long wanem aweanes ol wokman meri bilong Ramu NiCo i kamapim.

Em i tok CA Dipatmen bai wok bung wantaim ol lain long ples long taim bilong karimaut monitoring.

Sampela ol kwesten na toktok we i kamaut long dispela miting em taim Basamuk LOA siaman, Lima Mullung i tok strong olsem Stet (Nesenel Gavman) insait long wok bilong DEC mas kamapim moa aweanes patrol long lukim olsem stretpela na trupela infomesen i kamaut. Dispela em bikos Ramu Nikel Projek em namba wan kain projek insait long Madang provins na PNG.

Wanpela mausman bilong Mindre viles, Terry Kuning i tok strong olsem wok bilong ol lain LOA Eksekutiv long bringim aut infomesen i go long ol ol pipel long ples i no wok long kamap gut tumas insait long ol las mun i go pinis.

Kuning i tok long dispela as tasol, sampela bilong ol i kamapim ol grup we i bung wantaim ol Non-gavman Ogenaisesen (NGO) na i mekim bikpela nois long go egensim DSTP (Dip Si Teilings Plesmen) long pastaim.

Em i tok tu olsem ol Nesenel Gavman DEC ofisa i save stap tasol long Mosbi na i save kam long Basamuk taim nois i kamap. Olsem na em i tok moa komyunikesen i mas kamap oltaim.

Narapela mausman, Sasa Grup bilong Sibibge klen i tokaut strong tu olsem i gat nid long Stet wantaim Madang Provinsal Gavman long kisim wanpela independent envairomen ofis long wok klostu wantaim ol long Projek.



Ol lain i bung long Murr konfrens rum long Basamuk long las wik Fonde.



Basamuk Rifaineri em i klostu reri long kirapim wok prodaksen.



Ol mausman i lukluk raun long bikpla bas long Basamuk Rifaineri Plent.

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

**Wanpela
Ramu NiCo,
Wanpela
Komyuniti**

Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisining.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta



Tumbuna bilas save sapotim turisim bisnis

Aja Alex Potabe i raitim

BILAS em i wanpela samting yumi PNG gat long pulim moa turis i kam insait long kantri. Long sampela hap long wol, i nogat dispela kain stailpela bilas i stap.

Tasol yumi Papua Niugini tasol i gat kainkain bilas i stap. Yumi gat moa long 800 kainkain tokples. Dispela i minim kantri bilong yumi i gat moa long 800 kain kain pasin tumbuna na bilas wantaim.

Sapos yu go long Australia o Nu Silan, bai yu nonap painim kain bilas olsem bilong yumi PNG. Bilas bilong PNG em i stailpela stret.

Wanpela save man bilong turisim na leksera bilong turisim na hospitaliti long Yuni- vesiti ov Papua Niugini (UPNG), Ange Hayape, i tok PNG mas holim strong pasin kalsa na pasin tumbuna bikos dispela i gat bikipela sans long sevim dispela kantri bi- hain taim.

“Nau gavman i sindaun natap long bilian kina ol i wok long kisim long hamas gol projek yumi gat insait long kantri. Tasol wanpela taim ol dispela risos bai pinis. Dis- pela taim kantri bai kisim bikipela taim stret,” Hayape i tok.

Taim kantri i kisim taim, bilas em i ken kamap olsem wanpela risos tu. Em i tok wanpela bikipela samting gavman i givim baksait nau long dispela kantri em i tur- isim na hospitaliti bisnis.

“Turisim em i no save pinis. Em i no olsem gol, kopa, ges o wel. Em i nonap pinis. Em i samting bilong stap yet ol taim. Olsem na ol i kolim tur- isim indastri em i wanpela sastenebel bisnis,” Hayape i tok.

Hayape, husat i nau mekim Dokta ov Pilosopi (PhD) digri bilong en long Turisim na Hospitaliti long UPNG, i tok salens i nau stap long ol pipel na gavman wantaim long larim pasin tumbuna bilong yumi i stap laip yet, na long larim gavman i sapotim ol pipel long holim strong kalsa na, na tu long kirapim turisim indastri long kantri.

“Ol pipel i noken lus tingting olgeta long pasin tumbuna bi- long ol. Yes, yumi ken bi- hainim pasin bilong waitman bikos nau em i moden wol. Tasol yumi mas holim strong pasin tumbuna bilong yumi.

“Ol papamama mas lainim ol kalsa samting long ol pikinini bilong ol. Sapos yumi lusim pasin kalsa na bihain taim tu gol, ges, kopa, wel na ol arapela risos i pinis, bai yumi go we? Bai yumi stap olsem wanem? Kantri bai ron olsem wanem?” Hayape i askim.

Olsem na pipel i mas holim pasin tumbuna na kalsa bi-

long yumi. Ol tokples na pasin kalsa long sampela hap long kantri i lus pinis.

Sampela manmeri i no save long tokples bilong ol. Dispela i mekim ol lus tingting long kalsa na pasin tumbuna bilong ol.

Dispela kain pasin em i nogut bikos yumi wok long isi isi kilim dai kantri bilong yumi. Nau yet yumi no save long strong na veliu bilong bilas, pasin tumbuna na tokples bi- long yumi bikos yumi ting em ol samting nating tasol.

Ol waitman i wok long paulim tingting bilong yumi wantaim ol nupela samting olsem bia, smuk, kainkain kaikai, na ol stailpela klos. Em ol i no nogut tasol, yumi noken lus tingting olgeta long samting ol tumbuna bilong yumi i bin mekim i stap bipo long ol waitman i kam.

Hayape, husat i bin skul long Siapan (Japan) i tok, maski Japan em i wanpela biknem kantri long sains, teknoloji, na ikonomi wan- taim, gavman i save bilip strong long turisim olsem wanpela gutpela bisnis long larim ol pipel i wok mani yet, mekim sait mani bilong ol yet, maketim ples bilong ol, na tu apim nem bilong kantri olsem wanpela gutpela kantri.

“Ol manmeri Japan i holim yet pasin kalsa bilong ol. Maski ol i gat bikipela ol fektri, na ol arapela hevi indastri, pasin tumbuna i strong yet long hap.

“Long skelim ol pasin tum- buna bilong ol, moa turis manmeri i save kam long Japan. Japan i no olsem PNG, we yumi no bisi long turisim na larim ol foren kam- pani i kam rausim ol risos bi- long yumi na karim i go,” Hayape i tok.

Em i tok maski ol i gat, inap ol i save olsem wanpela taim ol dispela risos bai pinis. Taim dispela i kamap, i laik sapo- tim ikonomi wantaim turisim.

Long PNG, yumi laki tru. Em i tok yumi no olsem Japan, we ol i gat wanpela kalsa na tokples tasol.

“Yumi laki bikos PNG gat moa long 800 kain kain bilas. Dispela i ken winim Japan. Sapos gavman i luksave long turisim indastri, dispela bai kamapim planti gutpela samt- ing long kantri,” Hayape i tok.

PNG no save kamapim planti kalsurel so. Kalurel so em i wanpela gutpela samtin long pulim moa turis i kam in- sait long kantri.

Wankain taim, em i save larim ol manmeri i mekim pasin tumbuna bilong ol taim ol i bilas, singsing, kalap na danis.

Em i save larim yumi yet tokaut long wanem kain pasin tumbuna yumi gat. Planti ol nupela turis o sampela man- meri ol i bin save long PNG i save kirap nogut taim ol i



STAIL: Tumbuna bilas bilong ol Jiwaka em i wanpela bilong planti kainkain bilas PNG i gat long en. Ol yangpela manmeri i mas save long bilas, tokples na pasin tumbuna bikos em i ken sevim kantri long bihain taim. *Poto: Aja Alex Potabe*

save lukim kain kain kalsa bi- long yumi.

Wanpela turis bilong Israel, husat i bin kam raun long kantri, sampela wik i go pinis, i tok, PNG em i wanpela kain kantri em i no bin lukim.

Gilad Lev em i wanpela ami bilong Israeli Difens Fos, tasol em i bin kam raun lukim ples tupela wik olgeta long Mllen Be Provins.

“Mi man bilong raun long ol arapela kantri tu, tasol mi no bin lukim dispela kain bilas bi- long yupela. Man, em i nara- pela kain stret ya. Mi go long

Milen Be na lukim wanpela kain bilas. Long Mosbi, mi lukim narapela kain bilas.

“Mi no go yet long Rabaul na Sepik, tasol mi lukim long piksa ya, man bilas bilong ol i narapela kain stret ya. Skin kala, tokples, na pasin bilong yupela tu i difren olgeta namel long yupela yet,” Lev i tok.

Kain ol gutpela toktok bi- long ol turis i ken givim strong long yumi. Gavman tu i mas kisim strong long dis- pela kain toktok long mekim moa wok long kirapim dis-

pela indastri.

Gavman i ken kirapim tur- isim indastri sapos prais bi- olong ol hotel o ges haus na los i go daun. Mani mak bi- long baim balus isnait long PNG tu em i antap tumas. Dispela i mas go daun.


Gavman mas mekim planti nupela rot, bris, putim pawa, na pipel yet i mas senisim ol nogut paisn olsem stil, pulim kemra bi- long ol turis, repim ol meri, na arapela ol nogut pasin.

Gavman mas luksave gut long wok Turisim Promosen

Atoriti (TPA) i save mekim long promotim nem bilong kantri, olsem wanpela gut- pela ples bilong ol turis i ken kam raun.

Bilas na pasin tumbuna bilong yumi i ken mekim moa mani sapos yumi lukautim gut kalsa, na bihi- anim loa bilong kantri long mekim ol samting.

Turisim em i wanpela bikipela indastri, we em i gat sans long kirapim dispela ples sapos gavman i luk- save na pipel i senisim pasin nogut.



TENKYU LONG SAPOT: Ekar Keapu bilong National Niuspepa kisim wanpela presen i kam long Spot Federeesen long han bilong top Judo meri bilong PNG, Theresa Tona long welkam bek pati bilong ol.



SPONSA SMAIL: NGCB givim bikpela sapot long tim PNG go long olimpik gem long London, long welkam bek pati bilong ol tim PNG ol tok tenkyu i go long ol sponsa, Siaman bilong National Gaming Control Board Quinton Cholai i kisim wanpela presen long han bilong Dika Toua.



KOKOFA SOIM KALA: Tim Kokofa bilong Gordons wantaim nupela tiset bilong wantaim sponsa bilong ol.



TRAIM LONG WIN: Biknem pilaia wing atek bilong Paramana i pasim bal aut taim tupela pilaia bilong Mermaids i traim long stopim em long semi fainol gem bilong long wiken go pinis.



OL SOKA MERI SOIM STRONG: Meri Soka Lig kamap strong nau long bisini, olsem dispela tim bilong Yunivesiti na Mungkas i kaikai tit long stap insait long fainol. *Oi Poto Nicky Bernard*

TOKSAVE: Salim ol spots dro bilong yu kam long Feks; 325 2579, e-mel;nbernard@wantok.com.pg o kam lusim long Wantok Niuspepa opis long Central Waigani, NCD.

Kik bal – Wanjela stail gem tru

SAPOS yu laik lukim o pilaim wanjela gem we i gat stail bilong volibol na soka insait long en, o rait yu mas traime Sepak Takraw.

Dispela em i wanjela spot we bai laik long lukim long stat i go long pinis.

Na sapos yu wanjela pilaia bilong en, yu bai wanjela stail pilaia tru we ol manmeri bai laik long lukim yu pilai bilong wanem yu bai nap long mekim sampela kain ol stail we yu bai no inap mekim insait long ol arapela spot.

Long Sepak Takraw, ol pilaia i save paitim bal wantaim lek bilong ol tasol.

Ol i no save yusim han bilong ol.

Na tu, ol i save putim wanjela liklik net olsem volibol na kikim dispela bal i go i kam long traime na kisim poin.

Net i no antap tumas, tasol inap long yu ken kalap na kikim bal i go daun wantaim lek bilong yu.

Long dispela as, ol Sepak Takraw pilaia i save mekim ol kain kain stail bilong kalap na kik taim ol i pilai.

Sampela i save kalap na tanim wantaim na kikim bal i go bipo ol i pudaun na sanap gen long graun.

Em i no inap isi long yu lainim tasol yu tu i nap long pilai sapos yu lainim gut.

Histri bilong gem

I nogat tok klia long as tru bilong Sepak Takraw tasol ol piksa na stori bilong bipo i soim dispela gem i stap long 1500's yet na i kam, namel long Indonesia, Malaysia na Tailan (Thailand).

Namba wan hap tru we ol ripot i soim em i kamap pas em long Malaysia we wanjela pilaia i bin kikim bal i go paitim het bilong pikinini bilong King na het bilas bilong em i pudaun.

Pikinini bilong King i belhat long dispela na i kilim dispela pilaia i dai.

Long Indonesia, gem i kamap strong long ol Riau ailan na Riau ples klostu long Sumatra namel long 16 sensri.

Long hap ol i save kolim gem, Sepak Raga, bihain tokples Malay.

Insait long gem, Sepak Raga, ol pilaia i save sanap raunim ol yet na kikim bal i go kam.

Wanwan i save gat sans long kikim bal na mekim stail bilong em na husat i kikim i go antap tru, abrusim ol arapela i save win.

Sampela taim ol i save traime long kikim i go antap long het bilong ol na holim insait long het karamap bilong ol.

Long Tailan, sampela ol piksa ol i penim long 1785 i soim wanjela God bilong ol Hindu, Hanuman i pilai Sepak Takraw wantaim sampela ol monki.

Sampela ol ripot i soim tu olsem dispela gem i bin stap long taim bilong King Naresuan husat i bin stap long 1590 i go long 1605.

Gem i stap planti handred yia bipo ol i stretim na kamapim gut long Tailan long 1740.

Long 1829, Siam Spots Asosiesen i raitim namba wan loa bilong pilai dispela gem insait long wanjela kompetisen.

4-pela yia bihain, ol i kisim net olsem long volibol, i go insait long gem na ol i kamapim namba wan kompetisen long pablik.

I no long taim, dispela spot i go insait long ol skul na i kamap olsem wanjela bikpela hap bilong kalsa bilong kantri we ol i pilaim long amamasim nupela konstitusen bilong kantri long 1933.

Long Filipins (Philippines) ol i save kolim "Sipa" na em i nesenel spot bilong ol.

Em i stap insait long olgeta elementri na hai skul bilong ol.

Long Burma ol i save kolim, "Chinlone, long Laoe em "Kator na Vietnam em "cau may."

Nem bilong dispela spot i kam long

Malaysia na Tailan – "Sepak" em tokples Malay we i min "kik" na "Takraw em i tokples nem bilong Tailan long dispela bal ol i save pilai gem wantaim.

I gat bilip, astingting bilong en i stat wantaim ami bilong Saina husat ol i save kikim wanjela liklik ai bilong botol i go kam namel long tupela man.

Nau em i wanjela bikpela spot namel long ol kantri long Esia na planti hap long wol tu.

Em i no wanjela Olimpik spot yet na i stap aninit long was bilong International Sepak Takraw Federation (ISTAF).

Stail bilong pilai

Long pilai Sepak Takraw, ol pilaia i save kikim bal i go kam long traime na kisim poin.

Ol i save pilai 5-pela set olsem volibol na tim we i winim moa set i save win.

Ol i save pilai antap long wanjela kot na i save gat wanjela net i stap namel long tupela tim we ol i save kikim bal i abrusim na i go long hapsait.

Sais bilong kot i wankain olsem kot bilong bedminton dabol sais kot.

I save gat tripela pilaia long wanwan tim na bal bilong ol i no olsem ol arapela bal.

Bal bilong ol em i no hevi na i malu malu olsem kanda tasol ol i somapim wantaim "rattan", em i skin bilong diwai, long mekim.

I gat tupela kain divisen bilong pilai Sepak Takraw, wanjela em "Regu" na narapela em "doubles regu".

Regu i save gat tripela pilaia long wanwan tim na Doubles Regu i save gat tupela pilaia long wanwan tim.

Sepak Takraw long PNG

I nogat wanjela Sepak Takraw kompetisen i stap long Papua Niugini tasol dispela i no min olsem i nogat man long dispela kantri save long pilai dispela gem.

I gat planti ol manmeri bilong ol arapela kantri olsem Indonesia na Tailan i stap tasol nau yet i nogat wanjela luksave long wanjela kompetisen bilong dispela spot i kamap.

Sapos em i kamap tu, bai em i nap long kisim bikpela luksave tu bilong wanem i gat planti manmeri husat i save laik long pilai soka na volibol na i gat sampela husat i save laik long mekim ol kain stail olsem ol Sepak Takraw pilaia i save mekim.

Ol i ken bungim dispela olgeta laik na save bilong ol taim ol i pilai dispela spot.

Em bai wanjela gutpela spot we i ken kamap namel long ol skul.



PUTIM LEK: Wanjela pilaia i traime long pasim bal wantaim lek bilong em.




LUKAUT: Ol pilaia i save mekim narapela kain stail long kikim bal.



BAL: Ol i save mekim bal bilong ol wantaim skin bilong wanjela diwai.



KARAMAP: i gat su bilong pilai we i no inap wel antap long kot.



PILAI GRAUN: Sepak takraw i save kamap antap long wanjela kot.



SPOTS DRO RAUN 24

Fraide : Ogas 24, 2012



Brookvale Oval
Manly V^s Broncos



Canberra Stadium
Raiders V^s Bulldogs



Sarare: Ogas 25, 2012



Centrebet Stadium
Panthers V^s Titans



WIN Stadium
Dragon V^s Warriors



Dairy Farmers Stadium
Cowboys V^s Knights



Sande: Ogas 26, 2012



Allianz Stadium
Roosters V^s W/Tigers



ANZ Stadium
Rabbitohs V^s Eels



Mande: Ogas 27, 2012



AAMI Park
Storm V^s Sharks



Raun 24 Points Leda

Pos	Tim	W	L	D	B	+/-	Pts
1.	Bulldogs	17	5	0	2	195	38
2.	Storm	15	7	0	2	196	34
3.	Rabbitohs	14	8	0	2	77	32
4.	Sea Eagles	14	8	0	2	76	32
5.	Cowboys	13	9	0	2	130	30
6.	Sharks	12	9	1	1	20	29
7.	Broncos	11	11	1	2	37	26
8.	West Tigers	11	11	0	2	-1	26
9.	Raiders	11	11	0	2	-39	26
10.	Titans	10	12	0	2	-6	24
11.	Knights	10	12	0	2	-20	24
12.	Dragons	9	13	0	2	-86	22
13.	Warriors	8	14	0	2	-60	20
14.	Roosters	7	14	1	2	-156	19
15.	Panthers	7	15	0	2	-173	18
16.	Eels	6	16	0	2	-190	16

Broncos redi pinis bilong bungim Manly

BRISBANE Broncos i go insait long tingting bilong fainols pinis.

Long Tunde nait yet, Kosa Anthony Griffin i kisim 18-man skwat bilong em i go long Sidni long redim ol long gem agen-sim sait i bin rausim ol long

fainols siris las yia.

Broncos i mas mekim las trening bilong ol long Red Hill bes bilong ol, tasol nau ol i go insait pinis long Isten Sabebs long Sidni.

Nau yet Broncos i sindaun long namba seven, na ol i mas

daunim Manly o Penrith long wik bihain long simenim sindaun bilong ol insait long top 8.

Sapos ol i lusim tupela gen wantaim, ol bai nogat rot long fainols. Em bai namba tu taim insait long 21 yia.

Ol i gat sampela ol biknem

pilaia bilong ol husat i bin stap aut long birua long bodi, bai ol i kam bek.

Ol fowet, Alex Glenn (ham-string), na Josh McGuire (ai) bai orait long pilai agensim Manly, husat i gat ol injuri wari bilong ol yet tu.

Raiders laik kamap namba wan

KEPTEN bilong ol Canberra Raiders, David Shillington i bilip sait bilong em i ken stap olsem ol premiasip fevret sapos ol i ken daunim namba 12 win bilong Canterbury Bulldogs dispela wik long Fraide nait.

Maski sapos ol i winim tupela laspela gem bilong ol, ol bai no inap stap insait long top 8 yet.

Canberra i bin strong na kam bek na nem bilong ol i pairap namel long faivpela klab husat i wok long resis

long laspela tupela spes bilong top 8, bihain long ol i winim Brisbane, Penrith na Roosters long ol wik i go pinis.

Tasol nau yet, ol i wok tirip namel long 8 na 9 posisen long leda.

Shillington i gat bilip yet.

Em i tok olsem i tru Bulldogs i wok long soim strong bilong ol, na ol i no lus yet, tasol husat tim inap long daunim ol, bai karim rispek na luksave i go insait long mun Septemba.

“Em bai bikipela samting

tru. Husat i ken rausim Bulldogs, bai gat nem olsem ol fevret long kompetisen,” em i tok. “Nogat narapela tim i ken winim ol, na mi ting i mas i gat ol lain i stap i ting ol bai pilai long gren fainol.”

Em i tok, sapos ol i lusim tupela gem bihain, bai ol i nogat sans. Tasol sapos ol i winim dispela wanpela gem, ol bai gat sans yet.

As bilong Bulldogs i wok long win dispela sisen, em fowet pek bilong ol. Tasol nau Tom Learoyd-Larhs na Dane

Tilse i kam bek long injuri, Shillington i bilip Raiders i gat inap bikipela man long sek-sekim ol Bulldogs.

“Dispela wik, em i bikipela samting,” em i tok. “Mi ting olsem sapos mipela i kirap strong long lain, bai mipela i surukim ol. Sapos yu sindaun na wetim ol, ol em ol bikipela man, ol i gat spid tu, na ol i ken tromoi bal. Olsem na maski yu laik soim na tekov, ol bai memeim yu yet. Tasol mipela gat ol bikipela man tu, na mipela bai redi.”

Fittler em man bilong sevim Blues

NU Saut Wels bod bai sindaun neks wik bilong intaviuim ol kendidet bilong kamap kosa bilong ol Blues.

Dispela wik yet, ol i mekim disisen olsem kosa bilong Blues bai mas wanpela kosa i wok fultaim, na i noken wok olsem kosa bilong wanpela NRL klab tu.

Ricky Stuart i bin lidim Blues laspela tupela sisen, aninit long polisi bilong wok kosa long klab na Blues wantaim. Na ol i no winim wanpela long dispela tupela sisen.

Stuart i bin kamapim planti gutpela senis long pilai bilong Blues, tasol em i bin sot long winim siris bilong ol.

NSW Bod i no laikim kosa i lukluk long tupela sait, na i no givim olgeta strong bilong em long Blues na Orijin.

Laurie Dale, Jim Dymock, Brad Fittler na Trent Barrett em ol nem i kamap long go pas long ol Blues neks yia.

Narapela nem i pairap, em bipo kosa bilong Eels na Warriors, Daniel Anderson.

Olgeta i gat strongpela save na pilai long gem, na sampela i gat moa save long ol arapela.

Daley i bin kosa bilong Kantri Orijin faivpela yia, na em i bin go pas long ol All Stars long taim em i bin kamap. Jim Dymock i stap kosa wantaim Bulldogs na Blues, na Trent Barrett i bin wanpela long ol asisten bilong Ricky Stuart long laspela tupela siris.

Tasol man husat i wok long pulim planti tingting, em Brad Fittler.

Olsem wanpela olupela pi-

laia, Freddy em i namba wan Orijin Pilaia bilong Blues. Na em i bin kamap wanpela lida bilong tim tu.

Insait long las foapela yia, em i bin kirapim ol Born to be Blue klinik wantaim ol yangpela, i go long olgeta hap kona bilong Nu Saut Wels. Nogat bikipela pairap, nogat paitim bros. Em i wok long mekim wok i stap. Freddy i save long Orijin, na em i save long ol kalsa na straksa bilong en. Na tu, em i save long givim dispela save long ol pilaia.

Taim em i stap kosa bilong Roosters, em i winim namba wan faivpela gem bilong ol long pinis bilong 2007, na em i kisim Roosters i go long top 4 long 2008.

Kosa save bilong em long tripela sisen wantaim Roost-

ers, tripela yia olsem City Orijin, na asisten long Mal Meninga wantaim Prait Ministas 13, na wokbung bilong em na Wayne Bennett long NRL All Stars, i em i bikipela samting.

Long dispela sait, Freddy i winim ol arapela biknem.

Wankain olsem Mal Meninga em i pes bilong Kwinslen, Freddy bai namba wan man bilong kamap pesman bilong Blues kempen long foapela yia i kam. Wankain olsem em i mekim taim em i pilai, em bai mekim wantaim Blues. Givim em sans tasol.

Ol Blues i bilip olsem Freddy em i man i ken pinisim sevenpela yia drai, na bringim ren i kam long Nu Saut Wels.



NIDIM SENIS: Ol Nu Saut Wels Blues i nidim wanpela gutpela kosa, na planti i tok Freddy em i raitman.

Tkatchenko tok PNG Gems bai on yet

Michael Novingu i raitim

MASKI planti toktok i kamap long midia o redio na niuspepa olsem Is Nu Briten i no redi long hostim PNG Gems, Spots Min-ista Justin Tkatchenko i tok pilai bai kamap yet long ENB.

Mista Tkatchenko i mekim dispela toktok bihain long em i

kam lukluk raun long hap bilong pilai las wik long Kokopo.

Em i tok, olsem Host Oge-naising Komiti (HOC), we Sir Rabbie Namaliu i go pas long em, i mekim gutpela wok redim ol hap bilong pilai bai kamap long ENB long Novemba, 2012.

Tkatchenko i tok em i amamas long lukim wok long Takubar pilai graun na ol arapela hap long ol distrik i go het

long redim ol hap bilong pilai bai kamap long Novemba.

“Ol toktok i kamap long redio na niuspepa olsem pilai graun i no redi long pilai bai i no inap long kamap long ENB i no tru,” Tkatchenko i tok.

Em i tok gavman bilong em i sapotim Namba 5 PNG gras ruts pilai i go het long ENB.

Moa yet, em i tok amamas long kam opim dispela gems

long Novemba.

Long wankain taim em i tok tenkyu long Deputi Praim Min-ista Leo Dion long helpim wantaim mani long kirapim wok go het.

Em i tok tenkyu tu long Sia-man bilong HOC Sir Rabbie Namaliu wantaim 12-pela wok komiti bilong em long wok hat long stretim ol samting long pilai bai go het gut long taim.



REDI, SET, GO: Francis Kompaon i tekov long wanpela womap resis las wik Sarere.

Ol Paralimpik Etlit bilong yumi tren strong

OL PARALIMPIK etlit bilong yumi i wok long tren strong long Inglan long redi long resis insait long 2012 Paralimpik Gems we bai kirap long Ogas 29, na ron i go inap Septemba 9.

Tupela biknem par-

alimpian husat bai karim flek bilong PNG, em Francis Kompaon bilong Is Nu Briten, husat bai ron long 100 na 200 mita resis, na Timothy Harabe, husat bai resis insait long Pawalifting, long 75

kilogrem kategori.

Wol renking bilong Kompaon long tupela resis bilong en, em namba 17, na Harabe, em i namba 30 long wol.

Las wik Sarere, Kompaon i bin stap insait

long ol womap resis long Cardiff Intanesenel Etletiks Senta.

Em i bin kisim planti nupela save long dispela womap resis, we em i bin resis agensim ol arapela etlit bilong Osenia rijen.

Mipela bilip long mipela yet

Samuel Koim i raitim

“MPELA i gat bikipela bilip long mipela yet, olsem na mipela bai pilai strong na go insait long fainols long dispela yia”.

Dispela toktok i bin kam long maus bilong kepten bilong Pot Mosbi Stop N Shop Vipers bihain long ol i winim sem-pion bilong Digicel Kap bilong las yia (2011) Binta-gor Goroka Lahanis.

Vipers i bin pilai strong tru long winim Lahanis 30-8.

Dispela gem mipla bin pilai me wanpela stail and strongpela gam stret. Olgeta pilaia na manesmen bilong Vipers i bin amamas

true long dispela win.

Mipela bin rere gut tru long wanpela wik na bin luk fowet stret long pilai wantaim ol.

Planti taim Vipers bin strong tru long difens bilong ol na mekim Lanahis i bin painim hat tru long brukim and ka-maut long hap bilong ol.

Planti taim tru gem bin stap insait long hap bilong ol Lahanis.

Dispela i bin mekim ol Lahanis takol planti tru na mekim ol fowet na beklain i bunslek hariap.

Bihain long tripela taim long kam long trai lain bilong Lahanis, Kumul na winga bilong Vipers, Elijah Riyong bin namba wan man long skoa long kona.

Dispela i givim ol as-ples tim Vipers strong tru long kam bek gen na skoa.

Man op da Mets and hap-bek bilong Vipers, Atte Bina Wabo bin soim olgeta stail na kontrolim gem gut tru. Sumatin na huka Noel Joel i bin stap long namel na mekim ol fowet i kisim ol gutpela pas. Dispela i mekim ol Vipers fowet olsem Steven Johns, Sebastian Pandia, Bobby Mori, Adam Korave, Enoch Maki, Tonny Die na Dick Nap i mekim planti gut-pela mita long helpim tim i mov i go het. Ol spitman olsem Richard Kambo, Kevin Frank na fulbek Joshuaia Abavu i bin isi tru long karimaut

ol gemplen bilong ol.

Lahanis tu i bin strong, tasol strong bi-long Vipers bin moa yet. Mipela i bin pilai wantaim hangre long winim dispela gem na mipela kisim wanem samting mipela laikim long em.

Mipela amamas nau olsem mipela win, tasol mipela gat tripela moa gem long pilai bipo mipela bai pilai gren fainols.

Long pilai grenfainols em wanpela longpela rot olgeta na mipela bai luk-luk strong tasol long wanpela gem long wanpela wik. Dispela win em go nau. Nau mipela bai lukluk long kisim ol Mu-ruks long dispela wik sande.

Namba Tu Wik Bilong Fainols

Samuel Peter Koim i raitim

DISPELA wik Sande bai lukim foapela tim tasol husat bai resis long go insait long semi-fainols. Dispela ol tim em Rabaul Gurias, Enga Mioks, Mendi Muruks na Mosbi

Vipers.

Gurias, husat i bin winim Maina Premia na malolo long wik i go pinis, bai pilai wantaim Enga Mioks long Kalabon fil long Rabaul.

Enga Mioks bin winim Mu-ruks wantaim bikipela skoa tru long wik i pinis long Wabag, na

i luk fowet stret long go pilaim ol Gurias long Rabaul.

“Mipela i gat sampela liklik wari na hevi insait long tim tasol mipela i stretim hariap tru bilong wanem Olgeta pilaia i rere na hangre long pilai fain-ols”, Namba tu Kosa bilong Mioks, Timothy Lepa i bin tok.

Narapela gem bai kamap long Lae em namel long Mendi Muruks and Mosbi Vipers.

Dispela bai wanpela strong-pela gem tru bilong wanem tim husat i lus long dispela gem bai go aut olgeta long dispela sisen 2012.

Tupela tim wantaim i gat ol gutpela man bilong pilai. Mu-ruks i gat kain strongpela man olsem Roy Kela, Joseph Omai na Charlie Wabo husat save karim tim olgeta taim i go insait long fainols long olgeta yia.

Dispela yia Vipers tu bin pilai

narapela kain gem olgeta. Planti bilong ol dispela gutpela gem na win i bin kamap long dispela yia wantaim helpim bi-long ol menesemen olsem Kosa Shane Morris, namba tu Kosa Paul Komboi, trena Solomon Kulunasi na Arua Ben Moide. Dispela yia tu bin lukim tim i bin kisim planti nu-pela pilaia long lo lokal klab na ol narapela tim olsem Timothy John Lomai, Enoch Maki,

Richard Kambo, Tonny Die na Bobby Kopi. Ol dispela pilaia i bin helpim Vipers long dispela yia wantaim planti ol strong-pela gem.

Vipers i rere tasol long pilai wantaim ol Muruks long dispela wik Sande. Wina bilong Vipers na Muruks gem long Lae na tim i lus long Gurias na Mioks gem long Rabaul bai pilai Semi Fainols long nara-pela wik bihain, long Mosbi.



Wok bilong Klab Menesmen Tim

NAU, yumi olgeta i mas save gut tru long ol wok bilong menesmen tim bilong wanwan klab. Tasol, pastaim long dispela, olgeta spot manmeri i save bi-hainim o sapotim wanpela klab i mas save na klia long wanem as tru na ol i kam bung wantaim long kamapim wanpela klab.

Klab em i wanem samting? Orai, klab em i wan-pela grup manmeri i gat wankain tingting, i kam bung wantaim long bihainim dispela tingting bilong ol. Dispela em i ples klia taim yumi lukim ol kain kain manmeri i kam bung wantaim. Maski ol bilong kain ples o tokples grup, em i no wanpela samting. Bikipela samting, em ol i bung long bihainim wankain tingting ol i gat long en.

Yumi lukluk long Soka. Olgeta kain manmeri i save kam bung wantaim long pilai dispela spot. Tasol long strongim laik bilong olgeta manmeri long klab, i gat ol lain i save holim wok bilong lukautim dispela wanpela tingting bilong olgeta manmeri. Ol dispela em ol i gat save long lukautim sindaun na laik bilong ol memba bilong ol. Tasol, moa yet, sefti bilong ol memba bilong ol em bikipela samting tru.

Long taim bilong makim menesmen tim, ol i save makim ol bihainim strong na save bilong ol long strongim menesmen bilong kalb. Ol dispela lain em ol i save kolim ol ‘menesmen tim’ o mobeta yet, ol ‘opis bera’, em nem ol spot manmeri bilong dispela kantri i save kolim ol.

Ol dispela lain i mas gat wanem kain save long menesim klab? Menesmen tim, em presiden, vais presiden, sekreteri na tresera i mas save long ol wok bilong ol, pastaim long ol i go het na mekim wok.

Presiden i mas klia olsem em i tim lida, na pas-taim, em i mas klia gut tru long wok bilong em. Long wankain taim, em i mas klia tu long wanwan wok bi-long ol tim memba bilong em. Dispela em antap moa long save na tingting bilong wanwan ol memba bilong em.

Presiden i mas oltaim mekim ol menesmen tim memba bilong em i karimaut ol wok bilong ol gut, na olgeta i bihainim wok ol i makim. Strongim bilip bilong tim em i narapela samting we bai gutpela bi-long olgeta klab memba.

Antap moa long olgeta wok ol i mas mekim, sefti bilong ol memba bilong ol em i bikipela samting, o namba wan samting i winim olgeta arapela wok bi-long klab. Sefti bilong ol long taim bilong trening na pilai em samting mi save toktok strongim oltaim. Em nau i stap long husat i save lukautim sefti bilong ol bihain long ol i trening, na long taim bilong pilai.

Konstitusen na ol klab rul na regulesen i mas strongim dispela eria bai i gat banis bilong ol klab memba sapos birua i kamap. Maski klab menes-men i nogat bisnis long ol memba bilong ol bihain long ol i pinisim trening na bihain long pilai, sam-pela ol sefti rot i mas stap long lukluk long tupela sait wantaim. Namba wan, na dispela em i bikipela samting long ol memba bilong menesmen tim, em long kamapim wanpela tok orait fom bilong olgeta klab memba long sainim na tok yesa long sapos birua i kamap, em i no rong bilong menesmen tim.

Ol arapela eria em long tinbim sefti bilong ol bi-hain long trening an pilai. Em i mas wok bilong menesmen tim bilong lukautim gut ol klab memba bilong ol inap ol i go gut long haus bihain long tren-ing na pilai.

Ol konstitusen na klab bai-loa i mas bihainim ol senis i kamap long komyuniti na ol birua bilong ol yangpela.

Sapos olgeta dispela samting i stap stret, mi bilip sindaun bilong ol klab memba bai stap strong taim klab i ron yet.

NEW PREMIUM TUNA

DIANA



PROUDLY PNG MADE





KOMPAON: Francis Kompaon bai makim PNG long 100 na 200m resis long 2012 Paralimpik Gems long London. (lukim stori insait)



Vipers gat bilip

BAI MI STRONG GEN: Sebastin Pandia, em wanpela strongpela fowed bilong Pot Mosbi Vipers. Dispela wiken gen em bai soim strong bilong em taim ol i kisim Mendi Muruk long semi fainol bilong ol. Sebastin na Vipers i soim gutpela pilai bilong ol long wiken go pinis taim ol winim Goroka Lahanis. Sapos ol soim dispela kain pilai gen ol bai winim gem isi tru. *Poto Nicky Bernard*

CARPENTERS MOTORS

Introdusim



● Nambawan Expiens ● Hamamas long Kisim ● Tru long Yumi

9.9% FAINANS long ol **DIAMOND CLASS VEHICLES** *Kondisens bai aplain!

Tel: 311 2233 | Fax: 311 2440 | Email: info@carpentersmotors.com | Website: www.carpentersmotors.com

- SETIFAID KILOMITAS
- 6 PELA MUN FRI SEVIS
- 6 PELA MUN ENSIN WARANTI
- SEFTI STIKA INSPEKSEN FRI LONG TAIM YU KISIM KAR (Inspeksen tasol)
- 10% DISCAUNT LONG OL PARTS NA LEIBA *Kondisens bai aplain
- OL SAVE TEKNISEN BAI SEVISIM KAR BILONG YU
- IGAT 20 POINT MEKENIKOL SEK